

# LE BULUÍ'INË' DIOS JUAN

## Apocalipsis

*Le bulu'e lahui Dios ca naca queë' Jesucristo*

<sup>1</sup> Lë ni naca le bulu'e lahui Jesucristo, le bë'ë Lë' lataj Dios ulu'inë' yugu' huen dxin queë' ca naca le run bayudxi ilácatë. Jesucristo gusöl-lë'ë tuë' gubáz lá'ayi queë', nu na' buzéajni'i neda', Juan, huen dxin queë' Cristo. Gubáz lá'ayi na' bulu'inë' neda' ca naca lë ni. <sup>2</sup> Neda', Juan, ruzúaja' lu guichi ni le naca idútë li ca naca yúgu'të le bilé'eda', en runa' ba nalí que xtídzë'ë Dios, en que le benë' ba nalí Jesucristo.

<sup>3</sup> Bica' ba nu ulaba didza' ni, ate' bica' bágaca nupa ulu'zë nágagaca nu na' ulaba xtídzë'ë Dios ni, en ilún ca rnna lë ni nazúaj lu guichi, tu' chizóa gaca.

*Juan ruzúajë' le uzéajni'i gadxi cö' böñachi queë' Cristo*

<sup>4</sup> Neda', Juan, ruzúaja' lu guichi didza' ni le uzéajni'i gadxi cö' böñachi queë' Cristo nacuá' luyú Asia. Dios, Bönni' zoa cazë', en guzóatica'së', en ral-la' huódë', rinábida'-në' uzá' ládxë'ë queëli', en gunë' ga cö'ö dxí icja ládxí'do'oli', ate' dzágagaca gadxi bö' Lë' nacuá' lahuë' Lë' ga ni' rö'ë rinná bë'ë.

<sup>5</sup> Dzáguië' ca' Jesucristo Lë'. Jesús ni runë' ca rnnë', en runë' ba nalí queë' Dios. Zí'alö Lë' bubanë' tsaz lu yöl-la' guti, en rinná bë'enë' bönni' ta'nná bë'ë yödzölió ni. Lë' nadxí'inë' ré'u, en gudibë' ré'u, tu' bugüë' dul-la' nabága'ru' len xichönë' le bulaljë'

lë'e yaga cruz, cate' gútië' uláz queéru'. <sup>6</sup> Jesucristo benë' ga rinná bë'ëru', en ga nácaru' yugu' bixúz, para cù'uru'-në' Dios, Xuzë' Jesús, yöl-la' ba. ¡Yöl-la' ba Lë', en gácatica'sö queë' yöl-la' unná bë'! ¡Ca' gaca!

<sup>7</sup> ¡Buli'yútsöca! ¡Zë'ë Cristo lu böaj lúzziba! ¡Illa'lé'e Lë' yúgu'të böñachi, enca' nupa ni' gulún Lë' huë', en bëtigaca Lë'! ¡Illa'bödxi yechi' yúgu'të böñachi yödzölió ni cate' illa'lé'e Lë'! ¡La'tu' gácatë caní! ¡Ca' gaca!

<sup>8</sup> Caní rnnë' Lë': "Neda' naca' Bönni' zoë' zí'alö, enca' Bönni' röjsétië' ca naca le risí lo, en le ruúdxítë." Caní rnnë' Xanru', Bönni' napa cazë' yöl-la' huáca. ¡Zoa cazë' Lë', en guzóatica'së', en si' ulë'ë!

### *Rilé'enë Juan yöl-la' zxön queë' Jesucristo*

<sup>9</sup> Neda', Juan, naca' böchi' luzá'ali', en tsözxön rigui'i rizáca'lena' libí'ili', en tsözxön len libí'ili' ruzi'a xibé le rinná bë'ë Dios, en nadéli'da' yöl-la' riböza zxön ladxi' na' runnë' Jesucristo queéru'. Nadzuna' tu luyú bidxi ni gatsaj láhui'lö nísado', nazí'i le Patmos. Nadzuna' tu' bena' libán que xtídzë'ë Dios, en tu' bena' ba nali' queë' Jesucristo.

<sup>10</sup> Lu dza lá'ayi queë' Xanru', guzóalenë' Dios Bö' Lá'ayi neda', ate' biyönda' cùdzu'la' chi'ë tu bönni' rulidzë' zidzaj. Biyön chi'ë ca ribödxi lúzuba' böa' bëdxi. <sup>11</sup> Bönni' ni gudxë' neda': "Neda' naca' Bönni' zoë' zí'alö, en Bönni' röjsétië' ca naca le risí lo, en le ruúdxítë. Buzúaj lu guichi le riyönnu', en rilé'enu', ate' gusöl-la' le quéguequi gadxi cö' böñachi quia' nacuá' luyú Asia, nupa nacuá':

Lu yödzö Éfeso,  
lu yödzö Esmirna,

lu yödzö Pérgamo,  
 lu yödzö Tiatira,  
 lu yödzö Sardis,  
 lu yödzö Filadelfia,  
 lu yödzö Laodicea.”

<sup>12</sup> Buécja' para ilé'eda' Bönni' na' rulidzë' neda'. Cate' buécja', bilé'eda' gadxi le nuá'gaca guí' le néquiguequini oro. <sup>13</sup> Ladaj gadxi le nuá'gaca guí' na' bilé'eda' tu Bönni' riné'ë ca tu bönni'. Nácuë' tu lari' tunna le ridxín xini'ë, en luchu'ë nasië' tu le néquini oro. <sup>14</sup> Chiguichido'os naca guitsa' icjë' ca naca zxila' o ca riná'bogui', ate' rëpi yösa bení'guijöj lahuë' ca guí'. <sup>15</sup> Rëpi yösa bení' ni'ë ca guië bronce dxílido', le nudzé'eda' lu guí' ca bo' yalaj. Zidzaj biyön chi'ë ca riyön tu yegu zxön. <sup>16</sup> Lu në'ë ibëla zxóagacaba' gadxi bölaj bení', ate' rirúaj didza' ru'ë le naca ca tu guië tuchi' natuchi' iropa la'a. Rëpi yösa bení' lahuë' ca gubidza cate' rudzá'a.

<sup>17</sup> Cate' bilé'eda' Lë' gudzö'a xini'ë ca tu bönni' nati. Ní'irö Lë' guxóa në'ë neda' len në'ë ibëla, en gudxë' neda': "Biti' gádxinu'. Neda' naca' Bönni' zoë' zí'alö, en röjsétië'. <sup>18</sup> Naca' Nu nabán caz. Gútia', ate' na'a zóatíca'sa' nabana'. Dë lu na'a inná bé'eda' yöl-la' guti, en lataj ga nacuá' nupa nátigaca. <sup>19</sup> Buzúaj lu guichi lë na' chibilé'enu', en le raca na'a, enca' le ral-la' gaca tödi na'a. <sup>20</sup> Lë ni naca le nagachi' ca naca quégacaba' gadxi bölaj bení' na' bilé'enu' zxóagacaba' lu na'a ibëla, en ca naca gadxi le nuá'gaca guí' le néquiguequini oro. Gadxi bölaj bení' na' sa'yéajgacaba' gadxi gubáz quégaca gadxi cö' bönachi quia', ate' gadxi le nuá'gaca guí' na' sa'yéajgaca gadxi cö' bönachi quia' na'.”

**2***Didza' gusöl-lë'ë yödzö Éfeso*

<sup>1</sup> Gunné' ca' Bönni' na': "Buzúaj lu guichi didza' ni isöl-lu'u queë' gubáz quia' zóalenë' bönachi quia' lu yödzö Éfeso. Caní uzúaju' lu guichi: Ru'ë didza' Bönni' na' zxóagacaba' gadxi bölaj bení' lu në'ë ibëla, en ridé' gatsaj láhui'lö gadxi le nuá'gaca guí' na' néquigueequini oro. <sup>2</sup> Caní rnnia': Neda' nöz quézida' yugu' le runli', en ca rúnda'ali' dxin. Nözda' ribözali' zxön ladxi', en biti' gaca guá' ilenli' nupa tua' dö'. Nözda' chiguzzí' bë'eli' nupa ta'nná nácagaca gubáz quia' pero biti' ca' nácagaca, ate' na'a nözili' ta'zí' yë'. <sup>3</sup> Ribözali' zxön ladxi', en chigudí'i guzxáca'li' tu' dá'ali' neda', pero biti' gu-cuidí' ládzi'li'. <sup>4</sup> Na'a, dë tu le ruzegui libí'ili' didza': Bíti'rö nadxi'ili' neda' ca na' bidxi'ili' neda' zí'alö, <sup>5</sup> Que lë ni na', guli'tsöjné ca na' benli' zí'alö, lë na' busanli', ate' na'a, buli'bí'i ládzi'li', en guli'gún ca na' benli' zí'alö. Channö cabí ubí'i ládzi'li', guídatia' queéli', ate' ugúa' le nuá' guí' queéli' xilataj. <sup>6</sup> Na'a, zoa tu le rácalen libí'ili'. Biti' rilé'eli' dxia' le tunë' bönni' nicolaíta, nupa na' ta'yéaj ládzi'gaca budó' guiöj budó' yaga, en tun le ruá' dö', lë na' lësca' biti' rilé'eda' dxia'. <sup>7</sup> Nu riyöni ral-la' uzë nagui lë ni rnné' Dios Bö' Lá'ayi, rui'ilené' yugu' cö' bönachi quia' neda', Cristo, didza', rnné': Nupa ila'deli' lu le raca yödzölió, guna' ga ilágugaca le ribía yaga da' gatsaj láhui'lö luyú lachi queë' Dios, le gun ga ila'cuá'tica'sö nabán."

*Didza' gusöl-lë'ë yödzö Esmirna*

<sup>8</sup> Gunné' ca': "Lësca' caní, buzúaj lu guichi didza' ni isöl-lu'u queë' gubáz quia' zóalenë' bönachi quia'

lu yödzö Esmirna. Caní uzúaju' lu guichi: Ru'ë didza' Bönni' na' zoë' zí'alö, en náquië' ca' Nu röjsete, Bönni' na' gútië', en bubanë' tsaz. <sup>9</sup> Caní rnnía': Neda' nöz quézida' le runli', en ca rigui'i rizáca'li'. Nözda' nácali' yechi', pero le nácatë rilé'eli' yöl-la' tsahui' le naca idú. Nözda' ca' ca ta'nné queëli' nupa ni' ta'nná nácagaca böñachi judío, pero biti' ca' nácagaca caní. Nupa ni ta'dá' Satanás, tu' xihui'. <sup>10</sup> Biti' ca' gádxili' le ral-la' qui'i sáca'li'. Tu' xihui' na' gun ga idzunli' bál-lali' libí'ili' lidxi guíë. Caní si' bë' libí'ili', ate' qui'i sáca'li' idú ca chi dza. Guli'tséajle' neda' ga idx-intë dza gátili', ate' neda' gunna' yöl-la' na'bán idú queëli'. <sup>11</sup> Nu riyöni ral-la' uzé nagui lë ni rnnë' Dios Bö' Lá'ayi, ruí'ilenë' didza' yugu' cö' böñachi quia' neda', Cristo, rnnë': Nupa ila'deli' lu le raca yödzölió, biti' bi gun yöl-la' guti quéguequi, lë na' gaca le buropi luzuí quégaca nupa ila'cuá'tica'sö lu guí' gabila."

### *Didza' gusöl-lë'ë yödzö Pérgamo*

<sup>12</sup> Gunnë' ca': "Lësca' caní buzúaj lu guichi didza' ni isöl-lu'u queë' gubáz quia' zóalenë' böñachi quia' lu yödzö Pérgamo. Caní uzúaju' lu guichi: Ru'ë didza' Bönni' na' nu'ë guíë tuchi' na' natuchi' iropa la'a. <sup>13</sup> Neda' nöz quézida' le runli'. Nözda' ca' zóali' ga ni' rinná bë' Satanás, tu' xihui', pero ni ruzxöni ládxi'li' neda'. Biti' ca' nusanli' ca réajle'eli' neda'. Biti' busanli' le yugu' dza ni' cate' gulútië' Antipas, bönni' ni' bénatica'së' ba nalí quia', en gútië' ga ni' zoa Satanás, tu' xihui'. <sup>14</sup> Na'a, dë tu chopá le tu'zegui libí'ili' didza': Nacuá'len libí'ili' bal-la böñachi lu yödzö Pérgamo, nazi' lu

né'eguequi xibá queë' Balaam, bönni' ni' busédinë' Balac benë' ga gula'chixi gula'nigui bönachi Israel, ate' gulahuë'-ba' yugu' böa' bédxido' gulútigaquië'-ba' lögaca budó' guiøj budó' yaga, en gulunë' le ruá' dö'. <sup>15</sup> Lësca' caní nacuá'len libí'ili' nupa ni' nazí' lu né'eguequi xibá quégaca bönachi nicolaíta, lë na' biti' rilé'eda' neda' dxí'a. <sup>16</sup> Que lë ni na', buli'bí'i ládxí'ili' na'a. Channö cabí ubí'i ládxí'ili', guídatea' ga zóali', en tíl-lalena' légaquië' len didza' rirúaj ruá'a, le naca ca tu guíë tuchi'. <sup>17</sup> Nu riyöni ral-la' uzé nagui lë ni rnnë' Dios Bö' Lá'ayi, rui'ilenë' yugu' cö' bönachi quia' neda', Cristo, didza', rnnë': Nupa ila'deli' lu le raca yödzölió, guna' ga ilágugaca yôta maná nagachi'. Unödzja' ca' tu guiøj chiguichido' quégacië', ate' lu guiøj na' nazúaj tu la cubi, cuntu nu nunbë' le, pero núpasö na' ila'zí'i le, ilúnbë'e la na'."

### *Didza' gusöl-lë'ë yödzö Tiatira*

<sup>18</sup> Gunnë' ca': "Lësca' caní, buzúaj lu guichi didza' ni isöl-lu'u queë' gubáz quia' zóalenë' bönachi quia' lu yödzö Tiatira. Caní uzúaju' lu guichi: Ru'ë didza' Zxi'inë' Dios, Bönni' na' dxía guiøj lahuë' nácacaca ca guí', ate' ni'ë nácacaca ca guíë bronce dxílido'. <sup>19</sup> Caní rnnë': Neda' nöz quészida' le runli'. Nözda' ca nadxí'ili' neda', en ca réajlë'ëli' neda'. Nözda' ca' ca runli' xichina' lu yöl-la' riböza zxön ladxi' queëli'. Nözda' nácarö idú ca runli' yugu' lë ni ca benli' zí'alö. <sup>20</sup> Nacuá' tu chopá le tu'zegui libí'ili' didza': Ruí'ili'-nu lataj nigula na' lënu Jezabel, rnnanu ruí'inu didza' uláz queë' Dios, ate' ni'a que le rusédinu rizi' yé'enu bönni' tunë' xichina'. Rusédinu légaquië' le run ga

tunë' le ruá' dö', en tahuë'-ba' böa' bëdxido' ta'gu'ë légacaba' lógaca budó' guiój budó' yaga. <sup>21</sup> Neda' bë'a-nu lataj ubí'i ládxí'nu, pero biti' rë'ënину ucá'ananu le ruá' dö' na' runnu. <sup>22</sup> Que lë ni na' chú'una'-nu tu le gáti'nu ga na' qui'i sáca'nu lu xihuë'ënu tsözxön len nupa gulún tsözxön len lënu le ruá' dö'. Caní guna' na'a channö cabí ulu'bí'i ládxí'guequi para cabirö ilún dul-la' na'. <sup>23</sup> Guna' ga ilátibi' zxí'ininu. Caní gaca, iléquibe'e yúgu'të cö' böñachi quia' ruyúa' le ta'bequi ícjaguequi, en le ta'zá' ládxí'gaca böñachi, ate' ubi'a queëli' tsca naca le runli'. <sup>24</sup> Ia'zíca'li' zóali' yödzö Tiatira, nülöli' biti' nazí' lu ná'ali' lë na' rusédinu, en biti' nazédali' lë na' ta'nná böñachi ni' naca le nayéajni'i idú, pero le nácatë naca xtidza' Satanás, tu' xihui', rea' libí'il': Biti' usubága'a libí'il' ia'tú le ral-la' gunli'. <sup>25</sup> Na'a, lë na' chinazi' lu ná'ali', guli'gún chi'i ga idxintë dza huöda'. <sup>26</sup> Bönni' ni' ila'déli'në' lu le raca yödzölió, en ilunë' ca rë'ënda' neda' ga údxitë, neda' guna' ga ila'nná bë'enë' böñachi idútë yödzölió. <sup>27</sup> Ca na' budödë' Xuza' Dios yöl-la' unná bë' lu na'a, neda' ca' guna' ga ila'nná bë'enë' yugu' yödzö, ate' gata' lu ná'agaquië' tu xiyaga guíë, ate' ulu'zxuzxjë' böñachi na' ca nu ruzzuzzaj zxiga' yö'öna néquini yu. <sup>28</sup> Gu'a ca' le naca ca bëlaj hui sila quégaquië'. <sup>29</sup> Nu riyöni ral-la' uzé nagui lë ni rnñë' Dios Bö' Lá'ayi, ruí'ilenë' yugu' cö' böñachi quia' neda', Cristo, didza'."

### 3

*Didza' gusöl-lë'ë yödzö Sardis*

<sup>1</sup> Gunné' ca': "Lësca' caní buzúaj lu guichi didza' ni isöl-lu'u queë' gubáz quia' zóalenë' bönachi quia' lu yödzö Sardis. Caní uzúaju' lu guichi: Ru'ë didza' Bönni' na' nacuá'len Lë' gadxi bö' na', ate' zxóagacaba' gadxi bólaj bení' lu në'ë ibëla, rnnë': Neda' nöz quézida' le ruá' dö' runli', en nözda' chinati cázali' sal-la' téquiguequi bönachi zóali' nabanli'. <sup>2</sup> Buli'subán ládzi'li'. Guli'gún tsutsu le nacuá'len libíili', le chizóa ilátigaca, tu' réquibe'eda' le runli' biti' naca idú tsahui' lahuë' Dios. <sup>3</sup> Guli'tsöjné na'a xibá na' biyönili' le guzxí' lu ná'ali'. Guli'gún ca rnna xtídzë'ë Dios, en buli'bí'i ládzi'li'. Channö cabí usubán ládzi'li', guída' ga zóali' tsálido'os ca na' ridxinë' tsálido'os gubán, en biti' inözili' bizzi dza na' guída' ga zóali'. <sup>4</sup> Nacuá'len balla bönachi libíili' lu yödzö Sardis, nupa biti' nácagaca xihui'. Ila'dalen nupa ni neda', nácugaca lari' chiguichido'os le ruluí'i nuhuöácagaca idú tsahui', en nácagaca lesaca' gaca caní quéguequi. <sup>5</sup> Nupa ila'deli' lu le raca yödzölió ugácua' léguequi lari' chiguichido'os, en biti' usúlua' láguequi chinazúajgaca lu guichi ga nazúajgaca lágaca nupa nadéli'gaca yöl-la' na'bán idú. Si' lu na'a nupa ni lahuë' Xuza' Dios, enca' lógaquië' gubáz lá'ayi queë'. <sup>6</sup> Nu riyöni ral-la' uzé nagui lë ni rnnë' Dios Bö' Lá'ayi, rui'ilenë' yugu' cö' bönachi quia' neda', Cristo, didza'."

### *Didza' gusöl-lë'ë yödzö Filadelfia*

<sup>7</sup> Gunné' ca': "Lësca' caní buzúaj lu guichi didza' ni isöl-lu'u queë' gubáz quia' zóalenë' bönachi quia' lu yödzö Filadelfia. Caní uzúaju' lu guichi: Ru'ë didza' Bönni' na' náquië' lá'ayi, en ru'ë didza'

idútë li, en dë lu në'ë zxí'ini guíë queë' David, bönni' gunná bë'ë. Bönni' na' ru'ë didza' risálajë' ga nu riyaza, ate' cuntu nu gaca usayaj le, en rusayjë' ga nu riyaza, ate' cuntu nu gaca isalaj le. <sup>8</sup> Bönni' ni rnnë': Neda' nöz quézida' le runli'. Nözda' nápali' láti'do'os yöl-la' huáca, pero runli' ca rnna xtídza'a, en biti' rutu'ili' rnnali' néquili' quia'. Que lë ni na' nuzóa' loli' tu ga nu tsaz le nay-alaj, ate' cuntu nu gaca usayaj le. <sup>9</sup> Buli'yútsöca', ta'dé' bönni' ni' Satanás, tu' xihui', en ta'zí' yë'ë, ta'nnë' nácagaquië' bönachi judío ta'yéaj ládxí'gaca Dios, pero biti' nácagaquië' caní, guna' ga ila'dxinë' loli', en ulu'zechu zxíbigaquië' xiní'ali'. Ní'irö iléquibe'enë' nadxí'ida' libí'ili'. <sup>10</sup> Tu' benli' ca rnna xtídza'a, en gulózali' zxön ladxi', gun chi'a libí'ili' dza na' ila'guí'i ila'zaca' yúgu'të bönachi lu yödzölió ni, lë na' gaca para si' bë' léguequi. <sup>11</sup> ¡Si' guída'! Que lë ni na' guli'gún chi'i le nápali', para cabí gaca nu gun ga cabí sí'ili' lë na' ral-la' gunna' queëli'. <sup>12</sup> Núloli' ni' idéla'li' lu le raca yödzölió, neda' guna' ga gácali' tsutsu ca nácagaca ya'zxön, ate' sóali' yudo' ga na' zoë' Dios, en catu caz irúajli' ni'. Udá'a libí'ili' ca lë' Dios quia', enca' ca lë yödzö queë' Dios le naca Jerusalén cubi, le huötaj irúaj yehua' yubá lu në'ë Dios. Lësca' udá'a libí'ili' La' cubi. <sup>13</sup> Nu riyöni ral-la' uzé nagui lë ni rnnë' Dios Bö' Lá'ayi, ruí'ilenë' yugu' cö' bönachi quia' neda', Cristo, didza'."

### *Didza' gusöl-lë'ë yödzö Laodicea*

<sup>14</sup> Gunné' ca': "Lësca' caní buzúañ lu guichi didza' ni isöl-lu'u queë' gubáz quia' zóalenë' bönachi quia' lu yödzö Laodicea. Caní uzúaju' lu guichi: Ru'ë

didza' Bönni' na' zoë' tsaz, Bönni' runë' ca rnnë', en ru'ë didza' idútë li ca runë' ba nalí, en náquië' ca' Bönni' na' gulén lu në'ë yúgu'të le benë' Dios.

**15** Caní rnnë': Neda' nöz quézida' le runli'. Ca runli' naca ca nisa biti' naca ziaga, tu' cabí rucá'analí' tsaz neda', en biti' naca ca nisa zögui', tu' cabí dá'ali' neda' idú ládxí'li'. Dxí'arö gaca la' gácali' ca nisa ziaga o ca nisa zögui'. **16** Na'a, tu' nácali' ca nisa nati yúlasö, en biti' nácali' ca nisa ziaga, en biti' nácali' ca nisa zögui', chú'una' libí'ili' ca run nu ruhuébi nisa nati yula na'. **17** Libí'ili' rnnali' rilé'eli' yöl-la' tsahui' queéli', en raca dxí'a queéli', en biti' bi riyadzaj queéli', pero biti' réquibe'eli' le nácali'. ¡Bayechi' nácali'! ¡Nácali' xizí'! ¡Nácali' yechi', en lo chul-la, en ridali' xiguídisö!. **18** Que lë ni na', neda' ruzéajni'ida' libí'ili' gá'uli' le naca ca oro lu na'a neda' le nuna' dxí'a lu guí', para gata' yöl-la' tsahui' idú queéli'. Ral-la' gá'uli' ca' lari' chiguichi quia' le gáculi' para igachi' yöl-la' xiguídidö queéli' le run ga nu rutu'i. Ral-la' gá'uli' ca' quia' le gun ga ulu'huoáca guiój loli' para gaca ilé'eli' le naca quia'. **19** Neda' ruzeda' bach, en run zi'a yúgu'të nupa nadxí'ida' channö cabí tun le naca dxí'a. Que lë ni na', bulí'bí'i ládxí'li', en guli'gún xichina' idú ládxí'li'. **20** Bulí'yútsöca', neda' caz zuína' ga nu riyaza, en rulidza'. Channö núti'tës nu yöni chi'a, en isalaj quia', tsázia', en gágulena' nu na', ate' nu na' gágulen neda'. **21** Núloli' idéli'li' lu le raca yödzölió, neda' guna' ga cõ'öli' tsözxön len neda' ga na' rö'a rinná bë'a, ca na' benë' ca' Xuza' quia' neda'. Bidéli'da' neda' lu le guca quia', ate' gurö'lena' Xuza' tsözxön ga na' rö'ë rinná bë'ë.

22 Nu riyöni, ral-la' uzé nagui lë ni rnnë' Dios Bö' Lá'ayi, rui'lenë' didza' yugu' cö' böñachi quia' neda', Cristo."

## 4

### *Yöl-la' ba ta'gu'ë Dios yehua' yubá*

<sup>1</sup> Gudödi gulaca yugu' lë ni, buyúa', en bilé'eda' tu ga nu riyaza le nayalaj yehua' yubá. Biyönda' ca' chi'ë bönni' na' biyönda' zí'alö, ate' bulidza zidzaj ca ribödxi lúzuba' bö'a' bëdxi. Chi'i ni bulidza neda', gunná: "Gudá xitsá'alo ni, ate' neda' uluí'ida' li' le run bayudxi ilaca tödi ni."

<sup>2</sup> La' ní'isö guzóalenë' Dios Bö' Lá'ayi neda', ate' bilé'eda' yehua' yubá ni' tu lataj ga Nu rö'ö rinná bë', en bilé'eda' ca' Nu na' rö'ö lataj na'. <sup>3</sup> Rëpi yösa bení' Nu na' rö'ö lataj na', ca na' rëpi yösa bení' guiój jaspe, en guiój cornalina, yugu' guiój nazáca'da'. Idú gásibi'ilö lataj na' zoa biguita' le naca lachi ca naca guiój esmeralda, le répida' yösa bení'. <sup>4</sup> Idú gásibi'ilö lataj na' nacuá' ca' ia'tapa uruá' lataj gapa ta'bö' nupa ta'nná bë', ate' yugu' lataj na' rö'ögaquië' tapa uru'ë bönni' gula, nácugaquië' lari' chiguíchido'os, en dxíagaca ícjagaquië' le néquigueequini oro. <sup>5</sup> Ta'rúaj yösa, en guziú' rinnë lu lataj lo ga ni' rö'ö Nu na', ate' bö zxön ru'u. Lahui' lo lataj na' tu'zení' gadxi le ta'gú'u bení', le nácagaca gadxi bö' dzágagaca Dios. <sup>6</sup> Ca dödilö lahui lataj ni dë tu ca naca tu nísado' le rëpi yösa bení' ca guiój jara.

Nacuá' tapa nupa nabángaca cuiti lataj na', tsólá'a huéaj, ate' zián guiój lógaca dxíagaca zaca' cùdzi'löguequi, en láhuilöguequi. <sup>7</sup> Tu nu nutsa'

ladaj tapa ni nalá' ca nácaba' bëdxi guixi'. Nu na' buropi nalá' ca nácaba' bëdxi, ate' nu na' bunni nalá'lahui ca naca lo bönni', ate' nu budapi nalá' ca nácaba' bisiá' ruzuba'. <sup>8</sup> Idápaté nupa ni, nacuá' xopa xíligaca que queëguequi, ate' idá'alöguequi, en lë'elöguequi xíliquequi dxíada'gaca zián guiõj lóguequi. Rëla, en te ža biti' ta'cuá' dxisö, ta'nná: ¡Lá'ayi! ¡Lá'ayi! ¡Lá'ayi náquië' Xanru' Dios!  
 ¡Napa cazë' yöl-la' huáca!

¡Guzóa cazë' Lë', en zoa cazë', en chizóa ulë'!

<sup>9</sup> Nupa na' nabángaca ta'gú'u yöl-la' ba Nu na' rö'ö rinná bë', en zóatica'sö nabán. Tun bal Nu na', en të Nu na': "Xclenu'." Bátati'tës tun idapa na' caní, <sup>10</sup> tu'tsaga lógaca tapa uru'ë bönni' gula na' lu yu lahui' lo Nu na', en ta'yéaj ládxi'gaca Nu na' zóatica'sö, en tu'cu'ë le néquiguequini oro dxía ícjagaquië' lahui' lo lataj ga ni' rö'ö rinná bë' Nu na', ta'nné':

<sup>11</sup> ¡Xantu' Dios, nacu' lesaca'  
 cú'utu' Li' yöl-la' ba, en guntu' Li' bal,  
 en gata' quiu' yöl-la' unná bë' tu' benu' yúgu'të le  
 dë!  
 ¡Ca rë'ëni quézinu' nacuá', en gula'sí lo nacuá'!

## 5

### *Tu guichi, en Bönni' náquië' Bö'cu' Zxíla'do'*

<sup>1</sup> Ní'irö bilé'eda' tu guichi lu na' ibëla Nu na' rö'ö lataj lo. Guichi na' naca tu guichi nudubi, en dá'gaca didza' lë'elö, en láhuilö. Naguela' guichi na' gadxile nusáyajgacale. <sup>2</sup> Bilé'eda'-në'tuë' gubáz lá'ayi lo, ate' bë'ë zidzaj didza', gunné': "¿Nuzxi naca lesaca' uladzu' le naguélaga'gaca guichi ni, en usalaj le?"

<sup>3</sup> Cuntu nu guca usalaj guichi na', en biti' guca nu uyú le, calëga nu zoa yehua' yubá, en calëga nu zoa luyú, en calëga nu zoa zxánilö luyú. <sup>4</sup> Ní'irö gurödxa' tu' cabí bidzöli nu naca lesaca' usalaj guichi na', en biti' bidzöli nu naca lesaca' ulaba le, en cuntu nu naca lesaca' uyú le. <sup>5</sup> Ní'irö tuë' bönni' gula ni' gudxë' neda', gunnë': "Biti' cödxu'. Bönni' na' náquië' ca bëdxi guixi', en nabábalenë' zxí'ini xi'sóë' Judá, en náquië' ca' zxí'ini xi'sóë' David, chibidéli'në' lu yúgu'të le raca, en séqui'në' uládzü'ë le naguélä'gaca guichi ni, en usálajë' le."

<sup>6</sup> Ní'irö bilé'eda'-në' Bönni' náquië' Bö'cu' Zxíla'do', zuínë' lahui' lo lataj lo na' zoa gatsaj láhui'lö nupa na' nabángaca, en gatsaj láhui'lë' ca' yugu' bönni' gula na'. Dxíë' huë' ca naca que tu bö'cu' zxila' zoa nu bëti lëba' lahuë' Dios, nacuá' gadxi lúzuba', en gadxi guiöj loba', le tu'lui'i ca nácagaca gadxi bö' na' dzágagaca Dios, nasöl-lë'ë léguequi idútë yödzölió. <sup>7</sup> Gudödë' Bönni' náquië' Bö'cu' Zxíla'do', en gudélë'ë guichi na' lu na' ibëla Nu na' rö'ö lataj lo na'. <sup>8</sup> Cate' chigudélë'ë guichi na', bulu'zóa zxíbiguequi idapa nupa na' nabángaca, en idapa uru'ë bönni' gula na' lahuë' Bönni' na' náquië' Bö'cu' Zxíla'do'. Tu tuë' bönni' gula na' zöngaquië' le rul-la nazí'i le arpa, en nuá'agaquië' ca' yugu' zxíga'do' néquiguequini oro, yugu' le yúdzugaca yalaj, lë na' rulu'i yöl-la' rulidza Dios quégaca böñachi queë'. <sup>9</sup> Tul-lë' tu le rul-la yöl-la' ba, le naca cubi, le rnna caní:

Nacu' lesaca' quél'u guichi na',  
en uládzu'u le naguélä'gaca le,  
tu' bë'u lataj yugu' bönni' gulútië' Li',

ate' len xichönu' böá'uu' böñachi para ilequi queë'  
 Dios,  
 nupa nácagaca böñachi izá'a nacuá' idútë yödzölió,  
 böñachi tuí'i yúgu'të didza' yúbölö,  
 en nabábagaca yúgu'të yödzö,  
 en yúgu'të luyú nacuá' idútë yödzölió.  
**10** Benu' ga nácagaquië' bönni' ta'nná bë'ë  
 en ga nácagaquië' bixúz queë' Dios queëru'.  
 Benu' ga ta'nná bë'ë lu yu yödzölió.

**11** Ní'irö buyúa', en biyönda' chí'igaquië' gubáz  
 lá'ayi zián. Zián gáyu'ë, en gáyu'ë nacu'ë. Nacu'ë  
 idú gásibi'ilö lataj lo na' tsözxön len nupa na'  
 nabángaca, enca' yugu' bönni' gula na'. **12** Tu'ë  
 zidzaj didza' yúgu'të, ta'nné':  
 ¡Bönni' na' náquië' Bö'cu' Zxíla'do' gulútië',  
 náquië' lesaca' gata' yöl-la' unná bë' lu në'ë,  
 en yöl-la' tsahui', en yöl-la' réajni'i, en yöl-la' huácal  
 ¡Náquië' lesaca' gunru'-në' bal, en tseaj ládzi'ru' Lë',  
 en cú'uru'-në' yöl-la' ba!

**13** Ní'irö biyönda' tul-la yúgu'të le benë' Dios  
 yehua' yubá, en lu yu yödzölió, en zxánilö luyú, en  
 lu nísado'. Tul-la yúgu'të le nacuá' yugu' lataj na',  
 ta'nná:

¡Yöl-la' ba Nu na' rö'ö lataj lo,  
 enca' Bönni' na' náquië' Bö'cu' Zxíla'do'!  
 ¡Gúntica'siru'-në' bal  
 en cú'utica'siru'-në' yöl-la' ba,  
 ate' inná bë'tica'ssë' Lë'!

**14** Idápatë nupa na' nabángaca ta'nná: "¡Ca' gaca!"  
 Ní'irö idapa uru'ë bönni' gula na' bulu'tsaga  
 lógaquië' lu yu, en gula'yéaj ládzi'gaquië' Nu na'  
 zóatica'sö.

**6***Yugu' le naguélaga' guichi*

<sup>1</sup> Ní'irö bilé'eda'-në' Bönni' náquië' Bö'cu' Zxila'do', ate' buládzü'ë tu le naguela' guichi na', ate' biyönda' tu nu nutsa' ladaj idapa na' nabángaca, ate' biyön chi'i ca guziú' rinnë, gunná: “¡Gudá uyú!”

<sup>2</sup> Buyúa', en bilé'eda'-ba' tuba' böa' chiguichi, ate' nu na' dxía lëba' zön tu uxití' yaga. Gulu'ë lë' tu le néquini oro udxíë' icjë', ate' birúajë' ca tu nu nácatérö lo para idéli'në' lu gudil-la.

<sup>3</sup> Cate' buládzü'ë le buropi le naguela' guichi na', biyönda' nu buropi na' nabán, ate' gunná: “¡Gudá uyú!”

<sup>4</sup> Ní'irö birúajba' ia'tuba' böa', nácaba' xiná. Bulu'dödë' lu në'e nu na' dxía lëba' yöl-la' huáca unná bë' tsöjtúa yöl-la' riböza dxi'a tsáhui'do' quégaca bönachi, en gun ga iluti luzé'eguequi. Bulu'nödzjë' queë' tu guíë tuchi' zxön.

<sup>5</sup> Cate' buládzü'ë le bunni le naguela' guichi na', biyönda' nu bunni na' nabán, ate' gunná: “¡Gudá uyú!”

Buyúa', en bilé'eda'-ba' tuba' böa' gasaj, ate' nu na' dxía lëba' zön tu zxigóns. <sup>6</sup> Biyönda' ruí'i didza' tu chi'i gatsaj láhui'lö tapa na' nabángaca, ate' gunná: “Chopa guíë zxoa' xtila len lazzaj que tu dza huen dxin tu' gaca gubín, en xopa guíë zxoa' cebada len lazzaj que tu dza huen dxin, pero bití' gunu' ga yadzaj le naca za, en bití' bi gunu' que xisi uva nal-la.”

**7** Cate' buládzu'ë le budapi le naguela' guichi na', biyönda' rui'i didza' nu budapi na' nabán, ate' gunná: "¡Gudá uyú!"

**8** Buyúa', en bilé'eda'-ba' tuba' böa' gulaj, ate' nu na' dxía lëba' nazí'i le Yöl-la' Guti, ate' zéajlen nu na' nu nazí'i le Lataj Chul-la. Bulu'dödë' lu në'e nu na' inná be'e gatsaj tu gatsaj bönachi nacuá' yödzölió para guti léguequi len guié tuchi', en len yöl-la' ridún, en len yugu' yödzöhué', en len yugu' böa' guixi' sínia' dzö'öba' luyú.

**9** Cate' buládzu'ë le guyu' le naguela' guichi na', bilé'eda' zxan bucugu yehua' yubá ni' yugu' bö' gulaca cazë' bönni' ni' gulútië' légaquië' tu' gulunë' libán que xtídzë'ë Dios, en tu' gulunë' ba nalí queë'.

**10** Guluí'i zidzaj didza' yugu' bö' ni, gula'nná: "¡Xantu' Lá'ayi, runu' ca rnno! ¿Bátaxi caz uchi'a usöröu' queétu', en uzí'i lëbu' yugu' bönni' nacu'ë yödzölió tu' gulútië' netu?"

**11** Bulu'nödzjë' quéguequi yugu' lari' chiguíchido'os ilácuë', en gulë' léguequi: "Ral-la' uzí' ládxí'ilí' ia'tú chí'ido'osö, ga idinxnrö dza ila'dxín yúgu'të luzá'ali' huen dxin queë' Cristo ni, yugu' bönni' na' ral-la' iluti bönachi légaquië' ca' ca na' bëtigaca libí'ilí'."

**12** Cate' buládzu'ë le buzxopi le naguela' guichi na', buyúa', en bilé'eda' gudödida' budó' zxu' luyú. Böáca gasaj gubidza, en guca ca tu lari' guitsa' gasaj, ate' böáca beo' xiná ca naca rön.

**13** Gula'guínnaj böläj lúzxiba lu yu, le guca ca raca que yaga higo, cate' ta'guínnaj le ribía cate' rutá le bö' budunu'. **14** Gudödi que lúzxiba, ate' guca que ca raca que tu guichi cate' nu rutubi le.

Bulu'tsá' xilátjagaca yúgu'té guí'ado', enca' yúgu'té gapa zoa luyú bidxi lu nísado'. <sup>15</sup> Ní'irö yugu' bönni' ta'nná bë'ë luyú, en yugu' bönni' lo, en yugu' bönni' ta'lé'enë' yöl-la' tsahui', en yugu' bönni' ta'nná bë'enë' bönni' rójáquië' gudil-la, en yugu' bönni' dë lu ná'agaquië', en yúgu'té nupa nadó'ogaca, en yúgu'té nupa biti' nadó'ogaca bulu'cachi' lógaquië' gapa naca zxan bulóaj, en gapa naca lë'e guiøj lu guí'ado'. <sup>16</sup> Gulé' yugu' guí'ado' na', en yugu' lë'e guiøj na': "Guli'dubága' netu', en buli'cachi' netu', para cabí ilé'e Nu na' rö'ö lataj lo ni' netu', en para cabí ideli' yöl-la' rilé queë' Bönni' na' náquië' Bö'cu' Zxíla'do' netu'. <sup>17</sup> Chibidxín dza ulu'i lahui yöl-la' rilé quégaquië', ate' ¿nuzxi caz sequi' guá' ilén le?"

## 7

*Tu gayuá' yu' tapa-un milë' bönni'*

<sup>1</sup> Gudödi gulaca yugu' lë ni bilé'eda' tapa gubáz lá'ayi zuíguequinë' idapa la'a yödzölió. Tu'zágue'ë xinözgaca idapa bö' recja tsölä'a huéaj luyú, para cabí tsecja bö' luyú yödzölió, en para cabí tsecja lu nísado', en para cabí utá yaga. <sup>2</sup> Bilé'eda' ca' ia'túë' gubáz lá'ayi zë'ë rirúajë' ga rilén gubidza. Nu'ë tu le udé'ë nupa nácagaca queë' Dios ban le gaca bë' léguequi. Bë'ë zidzaj didza', en bulidzë' idapë' gubáz lá'ayi ni' nadödi lu ná'agaquië' yöl-la' huáca unná bë' ilún dítjanë' luyú, en nísado'. <sup>3</sup> Gudxë' légaquië': "Biti' gun dítjali' luyú, en nísado', en yugu' yaga cate' udá'arötü' tu le gaca bë' ra' xigágaquië' bönni' huen dxin queë' Dios queéru'."

<sup>4</sup> Biyönda' tsca nácagaquië' bönni' da' légaquië' lë na' naca bë'. Nácagaquië' idú tu gayuá' yu' tapa-un

milë' ladaj yúgu'të cö' zxí'ini xi'sóë' Israel. <sup>5</sup> Yugu' bönni' na' da' légaquië' lë na' naca bë' nácagaquië': Chinnu milë' di'a dza queë' Judá.  
 Chinnu milë' di'a dza queë' Rubén.  
 Chinnu milë' di'a dza queë' Gad.  
<sup>6</sup> Chinnu milë' di'a dza queë' Aser.  
 Chinnu milë' di'a dza queë' Neftalí.  
 Chinnu milë' di'a dza queë' Manasés.  
<sup>7</sup> Chinnu milë' di'a dza queë' Levi.  
 Chinnu milë' di'a dza queë' Isacar.  
<sup>8</sup> Chinnu milë' di'a dza queë' Zabulón.  
 Chinnu milë' di'a dza queë' José.  
 Chinnu milë' di'a dza queë' Benjamín.

*Bönachi guizxi yu nácugaca lari' chiguichido'os*

<sup>9</sup> Gudödi guca lë ni buyúa', en bilé'egacada' bönnachi zián, cuntu nu gaca ulaba léguequi. Nabábaguacië' yúgu'të yödzö tu'i didza' yúbölö idútë yödzölió. Zuíguequinë' ca dödilö lahui lataj lo, ga na' rö'ë ca' Bönni' na' náquië' Bö'cu' Zxíla'do', en nácugaquië' lari' chiguichido'os, en zöngaquië' zin. <sup>10</sup> Tu'ë zidzaj didza' yúgu'të', ta'nné':

¡Yöl-la' rusólá za' lu në'ë Dios queëru', rö'ë lataj lo ni,  
 en za' ca' lu në'ë Bönni' na' náquië' Bö'cu' Zxíla'do'!

<sup>11</sup> Zuíguequinë' yúgu'të gubáz lá'ayi idú gásibi'ilö lataj lo na', enca' idú gásibi'ilö ga nacu'ë bönni' gula, enca' idú gásibi'ilö ga nacuá' idapa na' nabángaca, ate' tu'tsaga lógaquië' lu yu ca dödilö lahui lataj lo na', en ta'yéaj ládxí'gaquië' Dios, <sup>12</sup> ta'nné':

¡Ca' gaca! ¡Yöl-la' ba Li', Dios queëtu'!  
 ¡Napu' yöl-la' zxön, en yöl-la' réajni'i!

¡Rëtu' Li': "Xclenu", en runtu' Li' bal!  
 ¡Napu' yöl-la' unná bë', en yöl-la' huáca!  
 ¡Gácatica'sö caní quiú', Dios queétu'  
 ¡Ca' gaca!

<sup>13</sup> Ní'irö gunábinë' neda' tuë' bönni' gula na',  
 gunnë': "¿Nupxi na' nácugaca lari' chiguíchido'os, en  
 gapxi bönni' légaquië?"

<sup>14</sup> Neda' gudxa' lë': "Xan, li' nöz quézinu'."

Lë' gudxë' neda': "Nupa ni gula'guí'i  
 gula'záca'da'. Gula'guíbë' lari' nácugacië', en  
 bulu'ún léguequi chiguíchido'os len xichönë' Bönni'  
 na' náquië' Bö'cu' Zxila'do'. <sup>15</sup> Que lë ni na' nacu'ë  
 ca dödilö lahui lataj lo ga rö'ë rinná bë'ë Dios,  
 en tunë' dxin lahuë' Lë' rëla, en të dza lu yudo'  
 queë'. Nu na' rö'ö lataj lo ni gun chi'i légaquië' tu'  
 zóalentica'sö légaquië'. <sup>16</sup> Bíti'rö ila'dunë', en bíti'rö  
 ila'bidxë' nisa, en bíti'rö ila'yéguinë' gubidza, en  
 bíti'rö iléquinë' xilá <sup>17</sup> tu' uyúë' Bönni' na' náquië'  
 Bö'cu' Zxila'do' légaquië' ca nu uyú bö'cu' zxila'.  
 Zoë' gatsaj láhui'lö lataj lo na'. Ichë'ë légaquië' gapa  
 ralaj nisa le ruí'i yöl-la' na'bán, ate' Dios uzxië'  
 lógaquië' nisa ta'bödxë'."

## 8

### *Le igadxi le naguela' guichi*

<sup>1</sup> Cate' buládzu'ë le igadxi le naguela' guichi  
 na', gurö'ö dxi yehua' yubá idú gatsaj hora.  
<sup>2</sup> Ní'irö bilé'egacada'-në' gadxi gubáz lá'ayi  
 na' zuíguequinë' lahuë' Dios, ate' bulu'dödë' lu  
 ná'agaquië' gadxi lúzuba' böa' bëdxi. <sup>3</sup> Ní'irö bidë'  
 ia'tué' gubáz lá'ayi, nu'ë tu zxiga'do' néquini oro, en  
 guzuínë' ra' bucugu yehua' yubá ni'. Gulú'udë'ë

yalaj lu në'ë para ugutsë' le len yöl-la' rulidza Dios le gulún yúgu'të bönachi queë' Cristo, en uzégui'ë le lu bucugu na' néquini oro, le zoa lahui lo lataj lo na'. <sup>4</sup> Gurén dzön que yalaj na' zoa lu në'ë gubáz lá'ayi na', en guca tuz len yöl-la' rulidza Dios le gulún bönachi queë' Cristo, ate' bidxín ga na' rö'ë Dios. <sup>5</sup> Ní'irö gubáz lá'ayi na' bulié' zxiga'do' na' len bo' yalaj dxía lu bucugu na', ate' gurú'unë' le luyú. Gunné guziú', ate' bö zidzaj biyón. Guyépi yösa, en gudödi budó' zxu'.

*Tu'cödxë' lúzuba' böa' bëdxi*

<sup>6</sup> Ní'irö igádxitë' gubáz lá'ayi na' zöngaquië' gadxi lúzuba' böa' bëdxi na' gula'cu'ë sina' ulu'cödxë' léguequi.

<sup>7</sup> Bucödxë' gubáz lá'ayi zí'alö lúzuba' böa' bëdxi, ate' gurö'ö guiöj bögui' yöla sunna, en gui' nutsí'i rön, ate' bulu'huöxaj luyú. Guyegui tu cö' tsa tu tsonna cö' le dë luyú ni, ate' guyegui ca' tu cö' tsa tu tsonna cö' yaga. Guyegui ca' yúgu'të guixi' ya'a.

<sup>8</sup> Bucödxë' gubáz lá'ayi buropi na' lúzuba' böa' bëdxi, ate' gubixi tu le naca ca tu guí'a zxön régui lu nísado', ate' ia'láti'do'os ca gatsaj tu gatsaj nísado' na' böáca rön. <sup>9</sup> Guti tu cö' tsa tu tsonna cö' le nabángaca dzö'ö lu nisa zxön na', ate' guca ditaj tu cö' tsa tu tsonna cö' le ta'dödi láhui'lö nisa na'.

<sup>10</sup> Bucödxë' gubáz lá'ayi bunni lúzuba' böa' bëdxi, ate' böxaj tu bölaj lúzxiba, le régui ca tu guí' yöri gapa dë nisa yegu, enca' gapa ralaj nisa, ate' guca caní que ia'láti'do'os ca gatsaj tu gatsaj nisa na' rö'ö luyú. <sup>11</sup> Bölaj ni läba' Ajenjo, le naca tu le silá', ate' böáca silá' ia'láti'do'os ca gatsaj tu gatsaj nisa gapa na' dë nisa, en guca ca naca le silá' na', ate' gulati bönachi zián ni'a que nisa na' böáca silá'.

<sup>12</sup> Bucödxë' gubáz lá'ayi budapi lúzuba' böa' bëdxi, ate' böáca chul-la ia'láti'do'os ca gatsaj tu gatsaj gubidza, en lësca' caní guca que beo', ate' böáca chul-la tu cö' tsa tu tsonna cö' bólaj. Caní guca, biti' buzení' gubidza ia'láti'do'os ca gatsaj tu gatsaj dza, en biti' bulu'zení' bólaj, en beo' ia'láti'do'os ca gatsaj tu gatsaj rëla.

<sup>13</sup> Ní'irö buyúa', en biyönda' ru'ë zidzaj didza' tuë' gubáz lá'ayi ridödë' gatsaj láhui'lö lúzxiba, en rnnë': “¡Bica' bayechi' libí'ili! ¡Bica' bayechi' libí'ili! ¡Bica' bayechi' libí'ili' zóali' luyú ni cate' ulu'cödxë' ia'tsonnë' gubáz lá'ayi na' lúzuba' böa' bëdxi!”

## 9

<sup>1</sup> Bucödxë' gubáz lá'ayi guyu' lúzuba' böa' bëdxi, ate' bilé'eda' nu naca ca tu bólaj lúzxiba böxaj luyú, ate' bulu'nödzjë' nu na' zxí'ini guíë que lataj chul-la. <sup>2</sup> Gusaljë' lataj chul-la na', ate' gurén dzön que lataj chul-la, le guca ca dzön rirúaj ga tu'zégu'ë bulá'do', ate' gula'chul-la gubidza, en lúzxiba ni'a que dzön na'. <sup>3</sup> Lu dzön na' bila'rúajba' böchi'zu, yugu' le gula'zxóasiba' luyú, ate' Dios bë'ë légacaba' lataj iládu'ba' böñachi ca tunba' xöjnö' dzö'öba' luyú. <sup>4</sup> Gunná bë'enë' légacaba' biti' ilún dítjaba' guixi' rö'ö luyú, en biti' ilún dítjaba' yugu' le naca ya'a, en calëga yugu' yaga, pero gácasö iládu'ba' böñachi na' biti' da' lë na' naca bë' nu nequi queë' Dios ra' xigágaquië'. <sup>5</sup> Biti' bë'ë légacaba' lataj ilútiba' légaquië', pero ulu'saca' zí'isiba' légaquië' idú ca gayu' beo'. Riláda' ga tádu'ba' ca na' rilá ga rádu'ba' xöjnö'. <sup>6</sup> Yugu' dza na' ilë'ënë' yugu' bönni' iluti

cuíngaquië', pero biti' ila'zéqui'në'. Ilé'ënинë' ilátië', pero ucuítia cuini yöl-la' guti.

<sup>7</sup> Nalá'gacaba' böchi'zu na' ca nácagacaba' böa' nácugacaba' le néquiguequini guíë, para tsójacaba' gudil-la. Dxíagaca ícjagacaba' le nácagaca ca tu le néquini oro. Naca lógacaba' ca naca lógaca böñachi. <sup>8</sup> Naca guitsa' ícjagacaba' ca naca guitsa' ícjanu nigula. Nácagaca láyi'gacaba' ca nácagaca láyi'ba' bëdxi guixi'. <sup>9</sup> Nácugaca luchú'ugacaba' le néquini guíë. Ta'gú'u bö xíligacaba' ca na' ta'gú'u bö carreta ná'ayöjgacaba' böa' ta'xítiba' lu gudilla. <sup>10</sup> Nácagaca xibángacaba' ca naca xibángacaba' xöjnö', zoa lí'igacaba'. Lu xibángacaba' na' zoa le tu'dí'iniba', para ilunba' zi' böñachi idú ca gayu' beo'. <sup>11</sup> Zoa nu rinná be'e légacaba', nu na' naca gubáz xihui' que lataj chul-la. Gubáz ni nazí'i le lu didza' hebreo: Abadón, le rnna lu didza' griego: Apolión, en lu didza' xidza': Nu Rusuniti.

<sup>12</sup> Chigudödi tu le rusuniti böñachi, le za' zí'alö, pero zá'gaca ia'chopa le ulu'suniti böñachi.

<sup>13</sup> Bucödxë' gubáz lá'ayi buzxopi lúzuba' böa' bëdxi, ate' biyönda' tu chi'i rui'i didza' gatsaj láhui'lö tapa le nácagaca ca lúzuba' bëdxi dá'gaca tapa squin bucugu na' néquini oro, le rö' lahuë' Dios. <sup>14</sup> Chi'i ni rui'ilen didza' gubáz lá'ayi buzxopi na' si' bucödxë' lúzuba' böa' bëdxi, en rnna: "Busedxi idápatë' gubáz xihui' na' nága'gaca ra' yegu Eufrates."

<sup>15</sup> Ní'irö bulu'sedxë' tapa gubáz xihui' na', chin-ucözë' Dios léguequí para la' ná'asö, le naca dza na', en beo' na', en izi na', para ilútigaca tu cö' tsa tu tsonna cö' böñachi nacuá' yödzöliö. <sup>16</sup> Biyönda' tsca

nácagaquië' bönni' röjáquië' gudil-la dxíagaquië'-ba' böa', en dzágagaquië' tapa gubáz xihui' na'. Nácagaquië' idú chopa gayuá' mil milë'.

**17** Bilé'egacada'-ba' böa' na' ca tu lu bixín, ate' nupa ta'bía légacaba' nacu luchú'uguequi le naca guí'do'os, en ya'a ca lúzxiba, en gulaj. Nácagaca ícjagacaba' böa' na' ca ícjaba' bëdxi guixi', ate' lu ruá'agacaba' ta'rúaj guí', en dzön, en tu le ruzéguí'da', nazí'i le azufre. **18** Yugu' lë na' ta'rúaj ruá'agacaba' bëtigaca tu cö' tsa tu tsonna cö' böñachi nacuá' luyú, lë na' nácagaca guí', en dzön, en lë na' ruzéguí'da'. **19** Yugu' le tu'dí'iniba' böa' na' ta'rúaj ruá'agacaba', en dzö'ö lu xibángacaba', tu' nácagaca xibángacaba' ca yugu' bëla zoa ícjagacaba' le tu'dí'iniba'.

**20** Ia'zíca'rö böñachi, nupa bití' gulati lu chopa ni tu'suniti, bití' bulu'bí'i ládxí'guequi para cabirö ilúngaca ca na' túngaca, en bití' bulu'sán ta'yéaj ládxí'guequi yugu' bô' xihui', en yugu' budó' guiój budó' yaga, yugu' budó' na' bití' ta'lé'e, en bití' ta'yöni, en bití' gaca sá'gaca. **21** Bití' bulu'bí'i ládxí'guequi para cabirö iluti böñachi, en calëga para cabirö ilúngaca yöl-la' gudzá' quéguequi, en le ruá' dö' túngaca, en yöl-la' ribán quéguequi.

## 10

### *Gubáz lá'ayi, nuá' lu né'ë tu guíchido'*

**1** Ní'irö bilé'eda'-në' ia'tué' gubáz lá'ayi nál-la, bötjë' birúajë' yehua' yubá, nácuë' böaj lúzxiba, en zoa ca tu biguita' ícjalë'. Rëpi yösa bení' lahuë' ca run gubidza, ate' nácagaca ni'ë ca ya'zxön ta'yegui. **2** Zoa lu né'ë tu guíchido' nayalaj, ate' tu ni'ë ibëla

nulibë' lu nísado', en ia'tú ni'ë yögöla nulibë' luyú bidxi. <sup>3</sup> Ní'irö bë'ë zidzaj didza', ate' biyön chi'ë ca riyön cate' ribödxi'aba' bëdxi guixi', en cate' budxi bë'ë zidzaj didza' na', bila'yöni chí'igaca gadxi guziú'. <sup>4</sup> Cate' budxi bila'yöni chí'igaca guziú' na', neda' si' uzúaja' lu guichi, pero biyönda' nu ru'i didza' yehua' yubá, rë neda': "Bucáchi'sö didza' ni guluí'i gadxi guziú' na'. Biti' uzúaju' didza' na' lu guichi."

<sup>5</sup> Ní'irö gubáz lá'ayi na' bilé'eda'-në' zuínë' lu nísado', en luyú bidxi, guchisa në'ë ibëla zaca' lúzzibalö, <sup>6</sup> ate' ben tsutsu xtídzë'ë ni'a que Nu na' zoa caz, Nu na' ben yehua' yubá, en le nacuá' ni', enca' yödzölió, en le nacuá' ni', enca' nísado', en le nacuá' ni', ate' gunné': "¡Bíti'rö tse! <sup>7</sup> Cate' ucödxë' gubáz lá'ayi igadxi lúzuba' böa' bëdxi, usudxinë' Dios le nagachi' queë', lë na' bului'inë' yugu' huen dxin queë', bönni' ni' gulu'ë didza' uláz queë'."

<sup>8</sup> Ní'irö chi'i na' biyönda' rirúaj yehua' yubá bë'len neda' didza' leyúbölö. Gunná: "Guyéaj, yöjxi' guíchido' nayalaj na' zönë' gubáz lá'ayi na' nulibë' lu nísado', en luyú bidxi."

<sup>9</sup> Guyija' ga na' zoë' gubáz lá'ayi na', en gunábida'-në' gunné' guíchido' na' quia'. Gubáz lá'ayi na' gudxë' neda', gunné': "¡Guzxi', gudagu! Lu ru'u gaca zxixi ca naca bidxína'do' queëba' buz, pero lë'u huöáca silá'."

<sup>10</sup> Guzxi'a guíchido' na' zönë', en gudahua' le. Lu ruá'a guca zxixi ca naca bidxína'do' na', pero cate' budxi gudahua' le, böáca silá' lë'a. <sup>11</sup> Ní'irö gudxë' neda': "Ral-la' gu'u didza' leyúbölö uláz queë' Dios lögaca zián cö' böñachi izá'a, en gapa nacuá' yúgu'të

yödzö, en gapa tuí'i zián didza' yúbölö, en lógaca zián bönni' unná bë'.”

## 11

### *Chopë' bönni' tunë' ba nalí*

<sup>1</sup> Ní'irö bidxín nu benna tu gui quia' le naca ca tu yaga ribixi, en gudxi neda': “Guyasa, en burixi yudo' queë' Dios. Burixi ca' bucugu lá'ayi que, en bulaba nupa nacuá' ni' ta'yéaj ládxi'gaca Dios. <sup>2</sup> Bucá'ana ca' lö'a que yudo' na' dë ní'ilö, en bití' urixu' le, tu' nadödi lu ná'agaca bönachi izá'a, ate' ulu'libi ulu'léaj yödzö lá'ayi na' idú ca chopa-un beo'.”

<sup>3</sup> Gudxë' ca' neda': “Isöl-la'a chopë' bönni' ilunë' ba nalí quia', ate' ilu'ë didza' uláz quia' idú ca chinnu gayuá' yu' tsónnalalaj dza, nácagaquië' lari' le naca bödzádzado'.” <sup>4</sup> Chopë' bönni' ni tunë' ba nalí, nácagaquië' chopa yaga olivo na' nazúaj lu guichi lá'ayi ca naca quégaquië', en nácagaquië' ca' chopa le nuá'gaca gui' na' nacuá' lahuë' Dios, Xani yödzölió. <sup>5</sup> Channö gué'ëni nu guá' dö' quégaquië', irúaj guí' ruá'agaquië' le usuniti nu na' rë'ëni guá' dö' quégaquië', en guti nu na', enca' nupa ta'dá'baga' légaquië'. <sup>6</sup> Chopë' ni dë lu ná'agaquië' ulu'zágue'ë xinöza nisa guiój lúzziba, para cabí galaj guiój tsca dza na' ral-la' ilu'ë didza' uláz queë' Dios, ate' dë lu ná'agaquië' ca' ilunë' ga huöáca nisa rön, en ilunë' ga gatsaj yödzöhuë' yödzölió. Ilunë' caní bálati'tés luzuí ilé'ënnë'. <sup>7</sup> Cate' údxí ilunë' ba nalí, irúajba' böa' sínia' lataj chulla, en tíl-lalenba' légaquië', en ucúl-laba' légaquië', en gútiba' légaquië'. <sup>8</sup> Le gulaca cazë' ila'túlusö ca' la' nöza lu yödzö zxön, ga ni' gudë'ë ca' Xanru' lë'e

yaga cruz, en ca rucúdzu'ru' didza', nazí'i le ca' Sodoma, enca' Egipto. <sup>9</sup> Idú ca tsonna dza yu' gatsaj böñachi yúgu'të yödzöö, en yúgu'të böñachi izá'a, en böñachi tuí'i zián didza' yúbölö, en böñachi yúgu'të luyú, ila'lé'eni le gulaca cazë', en biti' iluí' lataj nu ucache' légaquië' yeru ba. <sup>10</sup> Ulu'dzéjade'e nupa nacuá' yödzölió tu' gulatië', ate' lu yöl-la' rudzeja quéguequi ila'sól-la' le ulu'nödzaj quégaca luzé'eguequi, tu' bulu'saca' zi'ë chopë' ni gulu'ë didza' uláz queë' Dios böñachi nacuá' yödzölió.

<sup>11</sup> Ní'irö cate' chibizá'a tsonna dza yu' gat-saj na', Dios busubanë' légaquië', ate' gula'yasë' gulazuínë', ate' guladxi gula'dzöbi yúgu'të nupa bila'lé'e légaquië'. <sup>12</sup> Ní'irö bë' zidzaj didza' tu chi'i yehua' yubá, en gudxi légaquië': "Guli'cuén ni."

Gula'benë' lu böaj lúzxiba zaca' yehua' yubálö, ate' nupa na' gula'dá'baga' légaquië' bila'lé'e légaquië'. <sup>13</sup> La' ní'isö gudödida' budó' zxu', ate' biguinnaj tu cö' tsa tu chi cö' yugu' yu'u dzö'ö lu yödzö na', ate' lu budó' zxu' na', gulati tsónnalalaj yu' chi gayuá' böñachi. Guladxi gula'dzöbi nupa ni' nagá'anagaca, ate' gula'gú'u yöl-la' ba Dios zoë' yehua' yubá.

<sup>14</sup> Chigudödi le buropi le rusuniti böñachi, ate' chizóa idxín le bunni le usuniti léguequi.

*Rucödxë' gubáz lá'ayi igadxi lúzuba' böa' bëdxì*

<sup>15</sup> Bucödxë' gubáz lá'ayi igadxi lúzuba' böa' bëdxì, ate' guluí'i zidzaj didza' yugu' chi'i yehua' yubá, ta'nná:

Gapa ta'nná bë' böñachi yödzölió  
nadödigaca lu në'ë Xanru' Dios,  
en lu në'ë Cristo.

Lë' inná bë'tica'së'.

<sup>16</sup> Ní'irö idapa uru'ë bönni' gula na' rö'ögaquië' gapa na' ta'nná bë'ë lahuë' Dios, bulu'tsaga lógaquië' lu yu, en ta'yéaj ládx'i'gaquië' Dios.

<sup>17</sup> Ta'nné':

¡Xantu' Dios, napa cazu' yöl-la' huáca!

¡Guzóa cazu', en zoa cazu', en ral-la' guída cazu'!

¡Xclenu', tu' chibugunu' dxin yöl-la' huáca zxön quiu',

en risí lo' rinná bë'u!

<sup>18</sup> ¡Gula'lé bönnachi yugu' yödzö

pero chibidxín dza gunu' léguequi xíguia'!

¡Naca dza uchi'a usöröu' nupa chinátigaca!

¡Ubi'u quégaquië' huen dxin quiu',

yugu' bönni' gulu'ë didza' uláz quiu',

nupa néquiguequi quez quiu', en gulún bal Lo',

nupa nácagaca cá'asö, en nupa nácagaca lo!

¡Chibidxín dza usunítiu' nupa bulu'suniti yödzölió!

<sup>19</sup> Ní'irö guyalaj yudo' queë' Dios rö'ö yehua' yubá, ate' bilá' lahui guí'ina lá'ayi ga yu'u didza' rucá'ana tsahui' le nunë' Dios. Guyëpi yösa, en gulú'u bö zidzaj, en gunnë guziú' luyú. Gudödi budó' zxu', en gurö'ö guiøj bögui' yöla sunna.

## 12

### *Tunu nigula, en tuba' bëla zxön xitsiní'*

<sup>1</sup> Ní'irö bilá' lahui yehua' yubá tu le naca bë'da', bulu'i lonu tu nigula nácunu le naca ca gubidza, en zoa zxan ní'anu beo'. Dxía ícjanu tu le néquini oro ga dxíagacaba' chinnu bölaj bení'. <sup>2</sup> Nigula ni chizóa soa bí'ido' queënu, en ribödxinu tu' rúdia' lë'ënu. Rigu'i rizáca'nu ruzóanu bí'ido' queënu. <sup>3</sup> Ní'irö ia'tú le naca bë' bilá' lahui yehua' yubá. Bulu'i

loba' tuba' bëla zxön xitsini'. Nácaba' xiná gui'is, ate' dxíagaca gadxi ícjaba', en chi lúzuba', ate' dxía tu le néquini oro tu tu ícjaba' na'. <sup>4</sup> Len xibanba' gú'uyöjba' tu cö' tsa tu tsonna cö' böläj lúzziba, en gurú'unaba' légacaba' luyú. Guzuíba' bëla zxön xitsini' na' lonu nigula na' chizóa sóabi' bí'ido' queénu. Zóaba' sina' gáguba'-bi' bí'ido' queénu na' ca gáljabí' na'. <sup>5</sup> Buzóanu-bi' tubi' bi'i bönni'do' ralla' inná bë'ebi' yúgu'të yödzö len tu xiyaga guíé. La' bucuítaté'ë-bi' Dios bí'ido' queénu na', en buchisë-bi' ga ni' zoa cazë' Lë', rö'ë lataj lo ga na' rinná bë'ë. <sup>6</sup> Buzxúnnajnu nigula na', zéajnu lu lataj cá'asö, ga ni' chinupé'ë Dios lataj queénu. Ulu'gahuë'-nu ni' idú ca chinnu gayuá' yu' tsónnalalaj dza.

<sup>7</sup> Gudödi gulaca lë ni, gúcada' gudil-la yehua' yubá. Gubáz lá'ayi lo lë' Miguel, en yugu' gubáz lá'ayi dá'gaquië' lë' gula'dil-lalenë'-ba' bëla zxön xitsini' na'. Gula'dil-la bëla zxön na', en yugu' gubáz xihui' dá'gaca lëba' <sup>8</sup> pero biti' bila'deli' lu gudil-la na'. Que lë ni na' bíti'rö bidzöli xilátjagaca yehua' yubá. <sup>9</sup> Caní guca, gula'rú'unë'-ba' bëla zxön xitsini' na' ní'ilö. Nácaba' bëla na' zóaba' dza ni'te, lëba' tu' xihui'. Gula'rú'unë' tu' xihui' yödzölió, dzágagaca le gubáz xihui' na' dá'gaca le.

<sup>10</sup> Ní'irö biyönda' tu chi'i rui'i zidzaj didza' yehua' yubá, rnna: "Na'a chibidxín dza nulu'ë lahui yöl-la' rusólá nunë' Dios, en yöl-la' huáca queë', en le rinná bë'ë, enca'le rinná bë'ë Cristo, tu' chigula'rú'unë' ní'ilö nu na' buzegui yugu' böchi' luzá'aru' didza'. Rëla, en té dza buzegui légaquië' didza' lahuë' Dios queëru'. <sup>11</sup> Yugu' böchi' luzá'aru' ni bulu'cul-lë' nu na', tu' bulu'gunë' dxin xichönë' Bönni' na' náquië' Bö'cu' Zxíla'do' queë' Dios, en tu'

bulu'gunë' dxin didza' na' gulunë' ba nalí queë'. Biti' gulu'i ládxi'gaquië' yöl-la' na'bán quégaquië', pero gulátië'. <sup>12</sup> Que lë ni na' gaca yöl-la' rudzeja yehua' yubá. ¡Buli'dzeja libí'ili', zóali' ni'! ¡Bica' bayechi' libí'ili' zóali' yödzölió, en lu nísado', tu' chibötaj tu' xihui', en bidxín ga zóali'! Riléde'e tu' xihui' na' tu' chiréquibe'e ia'tú chí'isö dë lataj que."

<sup>13</sup> Cate' gúquibe'eba' bëla zxön xitsini' na' chigula'rú'unë'-ba' luyú, ní'irö yöjsóa régu'ba'-nu nigula na' buzóanu bi'i bönni'do' na' queënu. <sup>14</sup> Ní'irö Dios bë'ë-nu nigula na' chopa xíliba' bisiá' nácagaca zxön para gaca sunu, en icuítanu ga na' zóaba' bëla zxön xitsini' na', en idxinnu xilátjanu lu lataj cá'asö. Ni' ulu'gahuë'-nu idú tsonna iz yu' gatsaj. <sup>15</sup> Bëla zxön xitsini' na' gúbabaa' nisa zile zaca' cídu'lönu, le guca ca tu nisa yegu, en gú'uniba' gua'të nigula na'. <sup>16</sup> Ní'irö luyú gúcalen nigula na'. Guyalaj luyú na', en gü'i nisa yegu na' gúbabaa' bëla zxön xitsini' na'. <sup>17</sup> Ní'irö bëla zxön xitsini' na' guléde'eba'-nu nigula na', ate' guyéajba' yöjtí-lalenba' nupa nagá'anagaca queënu di'a dza queënu, nupa na' tun ca rnna le gunná bë'ë Dios, en nazi' lu né'eguequi le nunë' Jesucristo ba nalí.

## 13

### *Chópaba' böa' sínia'*

<sup>1</sup> Guzuída' lu yuzxi ra' nísado', en bilé'eda' ribenba'rirúajba' lu nísado'tuba' böa' sínia' dxíagaca gadxi ícjaba', en chi lúzuba'. Dxíagaca lúzuba' chi le néquini oro, ate' láhuigaca ícjaba' da' tu la le naca xihui' le cabí rile'e Dios dxi'a. <sup>2</sup> Böa' sínia' na' bilé'eda'-ba' riná'aba' ca nácaba' tu bëdxito',

nacuá' ní'aba' ca nácagaca ní'aba' oso, ate' ruá'aba' naca ca naca ruá'aba' bëdxi guixi'. Bëla zxön xitsini' na' budödiba' lu na'aba' böa' sínia' ni yöl-la' huáca queéba', enca' xilátjaba' ga rinná bë'ëba', en yöl-la' unná bë' zxön queéba'. <sup>3</sup> Dxia huë' tu ícjaba' böa' sínia' na', le naca le guti lëba', pero buniti huë' na', ate' bulu'bani yúgu'të böñachi yödzölió, en yöjdá'gaca böa' sínia' na'. <sup>4</sup> Gula'yéaj ládzi'gaquië'-ba' bëla zxön xitsini' na', tu' budödiba' yöl-la' unná bë' queéba' lu ná'aba' böa' sínia' na'. Gula'yéaj ládzi'gaquië'-ba' böa' sínia' na', en gula'nné': "¿Nuzxi caz naca zxön ca naca zxön böa' sínia' na', en nuzxi caz sequi' tíl-lalen lëba'?"

<sup>5</sup> Guta' lu ná'aba' böa' sínia' na' bë'ëba' didza' ba zxön, en didza' xihui' le rinnëba' queë' Dios. Idú ca chopá-un beo' guta' lu ná'aba' yöl-la' unná bë'. <sup>6</sup> Gusí loba' rinnëba' queë' Dios, en rinnë xihui'ba' que Lë' Dios, en que lataj lá'ayi queë', en quégaca nupa nacuá' yehua' yubá. <sup>7</sup> Guta' lu ná'aba' gudíl-lalenba' nupa néquiguequi quez queë' Dios, en bucúl-laba' légaquië'. Guta' ca' lu ná'aba' gunná bë'eba' yúgu'të böñachi izá'a, böñachi yúgu'të yödzö, en böñachi tuí'i yúgu'të didza' yúbölö, en böñachi idútë yödzölió. <sup>8</sup> Yúgu'të böñachi nacuá' yödzölió gula'yéaj ládzi'gaca böa' sínia' na', nupa na' biti' nazúajgaca láguequi lu guichi que yöl-la' na'bán, guichi na' buzúajé' Bönni' na' náquië' Bö'cu' Zxila'do' queë' Dios cate' si' guta' yödzölió. Buzúa cazé' Dios gútië' Bönni' na' ni'a quégaca böñachi queë'.

<sup>9</sup> Channö nu riyöni, ral-la' uzé nagui. <sup>10</sup> Nupa nucu'ë Dios idzúngaca, ral-la' idzúngaca, ate' nupa

nucu'ë Dios para nu guti léguequi len guíë tuchi', len guíë tuchi' ilátigaca. Que læ ni na', ral-la' ila'böza zxön ladxi' nupa néquiguequi queë' Dios, en ta'yéajlë' Lë'.

<sup>11</sup> Gudödi na' bilé'eda'-ba' ia'tuba' böa' sínia' gurenba' birúajba' lu yu. Dxíagaca chopla lúzuba' ca naca lúzuba' bö'cu' zxila', en ruí'iba' didza' ca na' ruí'iba' didza' bëla zxön xitsiní' na'. <sup>12</sup> Dë lu ná'aba' böa' sínia' ni yúgu'të yöl-la' unná bë' queéba' böa' sínia' bidxinba' zí'alö, cate' dzágaba' lëba'. Runba' böa' sínia' buropi ni ga ta'yéaj ládxi'gaca yúgu'të böñachi nacuá' yödzölió böa' sínia' zí'alö na', böa' na' buniti huë' le guti lëba'. <sup>13</sup> Böa' buropi na' runba' ca' le nácagaca bë' ga ridxitnë runba' ga ruhuöxa'j guí' le za' lúzxiba, en ruhuöxa'j luyú lógaca yúgu'të böñachi. <sup>14</sup> Rizí' yé'eba' böñachi nacuá' yödzölió len le nácagaca bë' dë lu ná'aba' runba' loba' böa' sínia' zí'alö na'. Rinná bë'eba' böñachi nacuá' yödzölió ilunë' tu budó' ca nácaba' böa' sínia' na' gúcaba' huë' que guíë tuchi', ate' nabanba'. <sup>15</sup> Dë lu ná'aba' runba' ga soa ibán budó' na' naca ca nácaba' böa' sínia' zí'alö na', en gü'i didza' budó' ni, en gun ga nu guti yúgu'të nupa biti' ila'yéaj ládxi'gaca le. <sup>16</sup> Benba' ga gudá' yúgu'të böñachi tu le naca bë' dá'gaca lëba', nupa nácagaca cá'asö, en nupa nácagaca lo, nupa ta'lé'e yöl-la' tsahui', en nupa nácagaca yechi', nupa biti' nadó'ogaca, en nupa nadó'ogaca. Budá'aba' le lu ná'agaca ibëla o ra' xigágaca böñachi na'. <sup>17</sup> Cuntu nu gaca bi ga'u o bi guti' channö cabí da' nu na' læ na' naca bë', o channö cabí da' nu na' laba' böa' sínia' na', o le nabábaba' nuá'aba'. <sup>18</sup> Na'a riquínnu' yöl-la' réajni'i. Nu napa yöl-la' réajni'i ral-la' ulábatëz tsca

le nabábaba' nuá'aba' böa' sínia' na', le naca ca le nababé' tu bönni', ate' le nabábaba' na' naca xopa gayuá' yu' tsónnalalaj yu' xopa.

## 14

### *Le tul-lë' tu gayuá' yu' tapa-un milë' bönni'*

<sup>1</sup> Gudödi ni' buyúa', en bilé'eda'-në' Bönni' na' náquië' Bö'cu' Zxíla'do' zuínë' lu guí'ado' nazí'i le Sión. Nacuá'lenë' Lë' tu gayuá' yu' tapa-un milë' bönni', da' ra' xigágaquië' Lë' Bönni' na' náquië' Bö'cu' Zxíla'do', enca' Lë' Xuzë'. <sup>2</sup> Ní'irö biyönda' tu le rigú'u bö yehua' yubá, le rinnë zidzaj ca rinnë tu yegu zxön, en ca rinnë guziú'. Biyönda' le riyön cate'ta'guínnië' lë'e tu le rul-la zë zián du que. <sup>3</sup> Tullë' tu le rul-la cubi, nacu'ë ca dödilö lahui lataj lo ni', enca' ca dödilö lahui ga na' nacuá' idapa nupa na' nabángaca len yugu' bönni' gula na'. Cúnturö nu gaca gul-la le rul-la ni, pero légacasë' tu gayuá' yu' tapa-un milë' bönni' ni, bönni' na' böá'uë' Cristo légaquië' ladaj bönachi yödzölió. <sup>4</sup> Nácagaquië' bönni' ni idú ladxi'. Biti' gula'cuá'lenë' nigula, tu' nácagaquië' idú bönni' ra'bán. Söjácalenë' Bönni' na' náquië' Bö'cu' Zxíla'do' gáti'tës ga sa'yéajë'. Cristo caz böá'uë' légaquië' ladjagaca bönachi, ate' nácagaca nupa bulu'dödi cuíngäquië' zí'alö queë' Dios, enca' queë' Bönni' na' náquië' Bö'cu' Zxíla'do'. <sup>5</sup> Catu caz gula'zí' yë'ë, ate' cuntu nu gaca bi innë quégaquië' ga na' nacu'ë ca dödilö lahui lataj lo ga rö'ë Dios.

### *Didza' röjuá'gaquië' tsonna gubáz lá'ayi*

<sup>6</sup> Ní'irö bilé'eda' ia'túë' gubáz lá'ayi, ridödë' lu bö'ös lúzxiba, en röju'ë didza' dxia' zóatica'sö para gunë' libán que lögaca nupa nacuá' yödzölió,

bönachi idútë luyú, yúgu'të bönnachi izá'a, en bönnachi tu'i yúgu'të didza' izá'a, en bönnachi yúgu'të yödzö.

**7** Ru'ë zidzaj didza', rnnë': “¡Guli'gádxí Dios, en guli'cu'ë yöl-la' ba tu' chizóa uchi'a usöröë' bönnachi! ¡Guli'tséaj ládxë'ë Dios, nunë' lúzziba, en luyú, en nísado', en gapa ralaj nisa!”

**8** Ia'túë' gubáz lá'ayi söjnáhuë' gubáz lá'ayi ni, en rnnë': “¡Chibudxi que yödzö Babilonia! ¡Chibudxi que yödzö zxön na'! Caní guca que, tu' gulún nupa nacuá' ni' ga gula'zí' lu na'agaquië' bönni' yúgu'të yödzö ilunë' ca nácagaca le ta'zë ládxí'gaquië' le ruá' dö'.”

**9** Ia'túë' gubáz lá'ayi söjnáhuë' gubáz lá'ayi buropi ni, en ru'ë zidzaj didza', rnnë': “¡Channö nu tseaj ladxi'-ba' böa' sínia' na', enca' budó' queéba', en güí'i lataj ta' ra' xigué o lu næ'e le naca bë' da' lëba', **10** gunë' Dios nu ni xíguia' lu yöl-la' rilé queë'! ¡Qui'i saca' nu na' lu gui', en lu lë na' ruzégui'da', lögaca gubáz lá'ayi, en lahuë' Bönni' na' náquië' Bö'cu' Zxíla'do'! **11** Cuéntica'sö dzön que gui' ga ni' qui'i saca' nu na'. Rëla, en te dza qui'i saca', ate' catu caz gata' lataj ulu'zí' ládxí'gaca nupa ila'yéaj ládxí'gaca-ba' böa' sínia' na', en budó' queéba'. Bití' ulu'zí' ládxí'gaca nupa ilui'i lataj ta' laba' léguequi. **12** Que lë ni na' nupa na' néquiguequi queë' Dios, en tun ca rnna le gunná bë'ë, en ta'yéajlë' Jesús, ral-la' ila'böza zxön ladxi'.”

**13** Ní'irö biyönda' chi'i nu ruí'i didza' yehua' yubá, en rë neda': “Buzúaj lu guichi lë ni: ¡Bica' bágaca nupa ilátigaca na'a si lo, nupa na' ta'yéajlë' Xanru'!”

Dios Bö' Lá'ayi rnnë': “¡Ca' gaca! ¡Ulu'zí' ládxí'gaquië' lu dxin gulunë', en ulu'zi'ë xibé ca

sa'yéaj le gulunë'!"

### *Tu'zi'ë le rulá' luyú*

**14** Ní'irö buyúa', en bilé'eda' tu böaj lúzxiba chiguíchido'os, ate' lu böaj na' rö'ë tu bönni' náquië' ca náquië' Bönni' Guljë' Bönachi, ate' dxia icjé' tu le néquini oro, ate' zönë' tu guíë tuchi' lu në'ë.  
**15** Birúajë' tuë' gubáz lá'ayi lu yudo' rö'ö yehua' yubá, ate' bë'ë zidzaj didza', en gudxë' Nu na' rö'ö lu böaj na', gunnë': "¡Bugún dxin guíë tuchi' quiu', en guchugu zxoa' xtila, tu' chibidxín dza nu uzí' le! ¡Chinabídx do que le dë yödzölió!"

**16** Ní'irö Nu na' rö'ö lu böaj na' bugún dxin guíë tuchi' idútë yödzölió, ate' buzi'ë le rulá' luyú.

**17** Ní'irö birúajë' tu gubáz lá'ayi lu yudo' zoa yehua' yubá. Nu'ë ca' tu guíë tuchi'. **18** Birúajë' ia'túë' gubáz lá'ayi ra' bucugu ni', dë lu në'ë inná bé'enë' gui', ate' bë'ë zidzaj didza', en bulidzë' gubáz lá'ayi zí'alö na' nu'ë guíë tuchi', gunnë': "¡Bugún dxin guíë tuchi' quiu', en butubi tu'xoa huéaj le ta'bía lubá uva rö'gaca yödzölió, tu' chiná le ta'bía lubá uva!"

**19** Ní'irö gubáz lá'ayi ni bugunë' dxin guíë tuchi' idútë yödzölió, en butubë' le ta'bía lubá uva rö'gaca luyú, ate' yöjchú'unë' le ta'bía lubá uva na' lu yeru zxön ga izí xisi. Yugu' lë ni rului'i ca gunë' Dios, gunë' xíguia' bönachi nacuá' yödzölió. **20** Bulu'libë' le ta'bía lubá uva na' lu lerui zoa ní'ilö ra' yödzö, ate' lu lerui na' birúaj rön, en gurén ga bidxitë ruá'agacaba' böa', en gudödi rön na' idú tsca gaca sá'aru' idú chinnu dza.

# 15

*Yugu' gubáz lá'ayi nuá'gaquië' gadxi yödzöhuë'*

<sup>1</sup> Bilé'eda' ia'tú le nácala' bë' yehua' yubá, le run ga nu rubani. Bila'rúajë' gadxi gubáz lá'ayi, nuá'agaquië' gadxi yödzöhuë' röjsétegaca, le ugunë' dxin Dios, údxí gunë' xíguia' böñachi yödzölió.

<sup>2</sup> Bilé'eda' ca' tu le naca ca tu nísado' le rëpi yösa bení' ca guiój jara le nutsí'i guí'. Nupa na' bulu'xicja lu böa' sínia' na', en lu budó' queëba', en lu laba', zuígaca lu lë na' naca ca tu nísado', en nuá'agaquië' le tul-la, yugu' le bë'ë Dios quégaquië'.

<sup>3</sup> Tul-lë' le rul-la na' bil-lë' Moisés, bönni' huen dxin queë' Dios. Naca tu le rul-la queë' Bönni' na' náquië' Bö'cu' Zxíla'do'. Ta'nné':

¡Li', Xantu' Dios, zxöntérö nacu' Li'!  
¡Zxöntérö naca yúgu'të le benu',  
le tun ga rubánitu'!

¡Li' rinná bë'enu' yugu' yödzö!  
¡Idú dxí'ado', en idú tsahui' naca ca bi runu'!

<sup>4</sup> ¿Nuzxi caz cabí gadxi Li', Xantu'?

¿Nuzxi caz cabí cu'u Li' yöl-la' ba?

¡Tuzu' Li' nacu' lá'ayi!

¡Ila'dxín böñachi yúgu'të yödzö,  
en ila'yéaj ládxí'guequi Li'

tu' ta'lé'e naca tsahui' yúgu'të le runu'!

<sup>5</sup> Gudödi guca lë ni, buyúa', en bilé'eda' guyalaj yudo' yehua' yubá ga ni' dë lataj lá'ayi que le naca bë' zóalenë' Dios böñachi queë'. <sup>6</sup> Bila'rúajë' gadxi gubáz lá'ayi lu lataj lá'ayi na', nuá'agaquië' gadxi yödzöhuë' na'. Nácugaquië' lari' nazáca'da' le rëpi yösa bení', en núga'gaca luchú'ugaquië' le néquiguequini oro. <sup>7</sup> Ní'irö tu nu nutsa' ladaj idapa

nupa na' nabángaca, bë' que queégaquië' gadxi gubáz lá'ayi na' gadxi zxíga'do' néquiguequini oro, en yúdzugaca le rulu'i yöl-la' rilé queë' Dios, Bönni' zoa cazë'. <sup>8</sup> Lu lataj lá'ayi na' bidzá'a dzön, tu' zoa ni' yöl-la' bení', en yöl-la' huáca zxön queë' Dios. Cuntu nu sequi' tsaza lu lataj lá'ayi na' cate' gátsjarö gadxi yödzöhuë' na' nuá'agaquië' gadxi gubáz lá'ayi na'.

## 16

*Yugu' zxíga'do' yúdzugaca le rulu'i yöl-la' rilé queë' Dios*

<sup>1</sup> Ní'irö biyönda' chi'i nu ruí'i zidzaj didza' lataj lá'ayi na', en rë gadxi gubáz lá'ayi na', rnna: "¡Guli'tséaj! ¡Guli'tsöjlálaj gadxi zxíga'do' na' lu yödzölió, le yúdzugaca lë na' rulu'i yöl-la' rilé queë' Dios!"

<sup>2</sup> Guyijë' gubáz lá'ayi zí'alö, en yöjlaljë' le yudzu zxíga'do' na' zönë' lu yödzölió. Lë na' yudzu zxíga'do' na' ben ga gutsaj yudzu' ya'a le riláda' idútë le naca caz nupa na' da' léguequi le naca bë' dá'gaca böa' sínia' na', enca' nupa na' ta'yéaj láxi'gaca budó' queëba'.

<sup>3</sup> Ní'irö guyijë' gubáz lá'ayi buropi, en yöjlaljë' le yudzu zxíga'do' na' zönë' lu nísado', ate' nisa na' böáca rön ca naca rön queë' tu bönni' nati, ate' gulati yúgu'të nupa nabángaca nacuá' lu nísado' na'.

<sup>4</sup> Guyijë' gubáz lá'ayi bunni, en yöjlaljë' le yudzu zxíga'do' na' zönë' gapa dë yegu, en gapa ralaj nisa, ate' gapa dë nisa na' bulu'huöáca rön. <sup>5</sup> Ní'irö biyönda' ru'ë didza' gubáz lá'ayi na' dë lu në'ë rinná bé'enë' nisa na', rnnë': "¡Xantu' Dios Lá'ayi!

¡Zoa cazu', en guzóa cazu'! ¡Tsahui' nacu' tu' richugu' caní quégaca bönachi <sup>6</sup> tu' bulu'laljé' rön quégaca nupa néquiguequi quez quiu', en quégaca nupa gului'i didza' uláz quiu'! ¡Na'a, Li' runu' ga ilé'ajé' rön, tu' caní ral-la' gaca quégaquié'!"

<sup>7</sup> Ní'irö biyönda' ruí'i didza' tu nu zoa ra' bucugu yehua' yubá ni', rnna: "¡Ca' gaca, Xantu' Dios, napa cazu' yöl-la' unná bë'! ¡Idútë li, en tsahui' naca ca richugu' quégaca bönachi!"

<sup>8</sup> Guyijé' gubáz lá'ayi budapi na', en yöjlaljé' le yudzu zxíga'do' na' zönë' lu gubidza, ate' gubidza na', bë'ë Dios le lataj uzégui'da' bönachi len guí' que. <sup>9</sup> Gula'yégui'da' yúgu'të bönachi tu ruzégui'da' gubidza, pero biti' bulu'bí'i ládxí'gaca, en biti' gula'gú'u Dios yöl-la' ba. Gula'nné zi'i queë' Dios, Bönni' dë lu në'ë inná bé'enë yugu' lë ni tu'saca' zi' bönachi.

<sup>10</sup> Guyijé' gubáz lá'ayi guyu' na', en yöjlaljé' le yudzu zxíga'do' zönë' lu xilataj böa' sínia' ga na' rinná bë'ëba', ate' gurö'ö chul-la gapa rinná bë'ëba'. Ní'irö, tu' gula'guí'i gula'zaca' bönachi, guláguya'a lúdxí'guequi, <sup>11</sup> pero biti' bulu'bí'i ládxí'gaca para cabirö ilúngaca le ruá' dö' tunë'. Gula'nné zi'i queë' Dios zoë' yehua' yubá tu' ta'guí'i ta'zaca', en tu' dxíagaca yudzu' ya'a na'.

<sup>12</sup> Guyijé' gubáz lá'ayi buzxopi na', en yöjlaljé' le yudzu zxíga'do' na' zönë' lu yegu zxön nazí'i le Eufrates, ate' gubidxi nisa yegu na' para ibá'a nöza ga ila'dödi nupa ta'nná bë', nupa ila'rúaj zaca' ga rilén gubidza.

<sup>13</sup> Ní'irö bilé'eda' bëla zxön xitsiní' na', en böa' sínia' na', en bönni' ru'ë didza' uláz quégacaba'. Bila'rúaj tsonna bö' xihui' tun ditaj bönachi lu

ruá'agaca nupa na'. Nalá'gaca ca nalá'gacaba' buludzu. <sup>14</sup> Nácagaca yonna bö' ni bö' que tu' xihui', bö' na' tun le nácagaca bë' le ilún ga ulú'bani böñachi. Yójaca bö' xihui' na' idú yödzölió, en yöjtúbigaca nupa ta'nná bë', para tsójáquié' lu gudil-la na' gaca lu dza zxön queë' Dios, Bönni' napa cazë' yöl-la' unná bë'. <sup>15</sup> Caní rnnë' Dios: "¡Buli'yútsöca! Guída'tsálido'os ca ridxinë' tu bönni' gubán. Bica' ba nu zoa ban ladxi', en run chi'i le nacu nu na', en rúntica'sö dxi'a, para cabí gun bayudxi ta xiguídisö, en para cabí utu'i nu na' lahui' lógaca böñachi." <sup>16</sup> Yugu' bö' xihui' na' bulu'tubi yugu' bönni' ta'nná bë'ë, ate' bulu'dubë' tu lataj nazí'i le lu didza' hebreo: Armagedón.

<sup>17</sup> Guyijë' gubáz lá'ayi igadxi na', en yöjlaljë' le yudzu zxíga'do' na' zönë' lu bö'ös, ate' bë' zidzaj didza' tu nu zoa lu lataj lá'ayi zoa yehua' yubá ga dë lataj lo na', rnna: "Chinaca."

<sup>18</sup> Ní'irö guyëpi yösa, en gurö'öda' bö, en gunnë guziú'. Gudödida' budó' zxu', le gudödida'rö ca gudödi tsanni ni nacuá' böñachi yödzölió. <sup>19</sup> Birúaj tsonna cö'ölö yödzö zxön na', ate' gula'guínnaj yödzö nacuá' yödzölió. Yöjenenë' Dios le naca xihui' gulún böñachi yödzö zxön na' nazí'i le Babilonia, ate' lu yöl-la' rilé queë' benë' xíguia' nupa nacuá' ni'. <sup>20</sup> Bila'gachi' yugu' luyú bidxi dzö'ö lu nísado', ate' bíti'rö gula'lá' yugu' guí'ado'. <sup>21</sup> Böxaj ca' guiöj bögui' yöla sunna, le za' lúzxiba, en yöjsóa ícjagaca böñachi, ate' nál-li' tu tu guiöj bögui' na' ca tu gayuá' guíë, ate' yúgu'të böñachi gula'nné xihui' queë' Dios tu' nözi guiöj bögui' na' tu' bulu'sáca'da' zi'iléguequi.

# 17

## *Dios richúguië' queénu nigula udá dzaga*

<sup>1</sup> Ní'irö bidxinë' tuë' gubáz lá'ayi ga zoa', nababë' gadxi gubáz lá'ayi na' gula'zönë' gadxi zxiga'do' na' néquiguequini oro. Bé'lenë' neda' didza', gunnë': "Gudá ni, ate' ulu'ida' li' ca gunë' Dios, gunë'-nu xíguia' nigula udá dzaga na', rö'önü lu nísado' zián. <sup>2</sup> Gula'cua'len lënu nupa ta'nná bë' luyú yödzölió, en gulún le ruá' dö', ate' gula'zudxi nupa nacuá' yödzölió ni, tu' gulunlen lënu le biti' naca dxí'a."

<sup>3</sup> Dios Bö' Lá'ayi guzóalenë' neda', ate' gubáz lá'ayi na' guché'ë neda' tu lu lataj cá'asö, ate' bilé'eda'-nu tu nigula ni' dxíanu cùdzu'ba' tuba' böa' sínia', nácaba' xiná guí'ido'os. Dxíagaca gadxi ícjaba', en chi lúzuba', en dá'gaca ca' lëba' le ta'nné xihui' queé' Dios. <sup>4</sup> Nigula na' dxíanu lëba' nácunu lari' xiná chul-la, en lari' xiná guí'ido'os. Nazi'i biquitaj queénu le néquiguequini oro, en yugu' guiöj nazaca', en yugu' bugá. Lu ná'anu rö'ö tu zxiga'do' néquini oro, en yudzu le nácagaca xihui', en le ruá' dö' runnu. <sup>5</sup> Ra' xigánu dá'gaca ca lënu, le tu'lui'i tu le nagachi', en ta'nná caní: "Yödzö Babilonia Le Naca Lo", en "Xiná'agacanu Nigula Udá Dzaga", en "Xiná'agaca Le Xihui' Dzö'ö Yödzölió."

<sup>6</sup> Gúquibe'eda' nazúdxinu nigula na' tu' bennu ga gulaj rön quégaca nupa néquiguequi queé' Dios, en quégaca nupa na' zoa nu bëti léguequi tu' gulún ba nalí queé' Jesús. Cate' bilé'eda'-nu, bubánide'eda'.

<sup>7</sup> Gudxë' gubáz lá'ayi na' neda', gunnë': "¿Bizx que rubáninu? Uzáejni'ida' li' lë na' nagachi', le rulu'i ca naca nigula ni, enca' le rulu'i ca naca böa' sínia' na' dxíanu-ba', böa' na' dxíagaca gadxi ícjaba', en chi

lúzuba'. <sup>8</sup> Böa' sínia' na' bilé'enu' guzóaba' zí'alö, pero biti' zóaba' na'a. Böa' ni chizóa irúajba' lataj chul-la, ate' tséajba' ga nítiba' tsaz. Ulu'bánide'e nupa nacuá'luyú cabí nazúajgaca láguequi lu guichi que yöl-la' na'bán, le buzúaje' Dios dza ni'te quez cate' si' gata' yödzölió. Cate' ila'lé'eni böa' sínia' na' guzóaba' zí'atélö, pero biti' zóaba' na'a, ulu'bani tu' nubanba'.

<sup>9</sup> Lë ni naca tu le uzéajni'i nu gaca tséajni'i: Gadxi ícjaba' na' tu'lui'i gadxi guí'ado' gapa rö'önü nigula na'. <sup>10</sup> Lësca' caní gadxi ícjaba' na' tu'lui'i gadxë' bönni' ta'nná bë'ë. Gáyu'ë bönni' ni chigudödi quégaquië'. Tuë' bönni' ni rinná bë'ë na'a, ate' ia'túë' biti' ridxíninë', pero cate' guídë', inná bë'ë tu chí'ido'osö. <sup>11</sup> Böa' sínia' na' guzóaba', pero biti' zóaba' na'a, rulu'i tu bönni' izxunu', inná bë'ë. Nunë' tsözxön bönni' gadxi na', ate' tödi ni nitië' tsaz.

<sup>12</sup> 'Chi lúzuba' na' bilé'enu' tu'lui'i chië' bönni' ila'nná bë'ë. Biti' ta'zí'ininë' yöl-la' unná bë', pero ila'zi'ë yöl-la' unná bë' tu chí'ido'osö, en ila'nná bë'ë tsözxön len böa' sínia' na'. <sup>13</sup> Chië' bönni' ni, lëbisö nácagaquië', ate' ulu'dödë' yöl-la' unná bë' quégaquië', en le nazi' lu ná'agaquië' lu ná'aba' böa' sínia' na'. <sup>14</sup> Ila'díl-lalenë' Bönni' na' náquië' Bö'cu' Zxila'do', pero Lë' ucul-lë' légaquië', tu' náquië' Xángaca yúgu'të nupa nácagaca xan, en náquië' Bönni' rinná bë'enë' yúgu'të nupa ta'nná bë'. Nupa nacuá'len Lë', bulidzë' Dios léguequi, en guröë' léguequi, ate' tsaz dá'gaca Lë'."

<sup>15</sup> Gubáz lá'ayi na' gudxë' ca' neda', gunnë': "Yugu' nísado' na' bilé'enu' gapa ni' rö'önü nigula udá' dzaga na', tu'lui'i böñachi yugu' yödzö, en

yugu' bönachi izá'a, en bönachi tuí'i yugu' didza' yúbölö, en bönachi yugu' luyú. <sup>16</sup> Chi lúzuba' böa' sínia' na' bilé'enu', en tu'lui'i chië' bönni', biti' ila'lé'ené'-nu nigula udá dzaga na' dxi'a, ate' ulu'cá'ané'-nu cá'assö, en xiguídísö. Ilahuë' xipëla'nu, en ulu'zégui'ë-nulen guí'. <sup>17</sup> Dios uchízië' icja láxhi'do'gaquië' chië' bönni' na' le gun ga iluné' ca ré'ëni quéziné' Lë', ate' ilácagaquië' tuz, en ulu'dödë' yöl-la' unná bë' quégäquië' lu ná'aba' böa' sínia' na' para gaca ca rnna xtídzë'ë. <sup>18</sup> Nigula na' bilé'enu'-nu ruluí'i yödzö zxön na' rinná bë'e nupa ta'nná bë' yödzölió ni."

## 18

### *Riguinnaj yödzö Babilonia*

<sup>1</sup> Gudödi na' bilé'eda'-në' ia'túë' gubáz lá'ayi ruhuötjë' rirúajë' yehua' yubá, en dë lu në'ë yöl-la' unná bë' zxön, ate' guyëpi yösa bení' luyú ni'a que yöl-la' bení' queë' gubáz lá'ayi na'. <sup>2</sup> Bë'ë zidzaj didza' gubáz lá'ayi na', gunnë':

¡Chibiguínnaj! ¡Chibiguínnaj Babilonia, yödzö zxön na'!

¡Chiböáca xilataj tu' xihui', en xilátjagaca bö' xihui' tun ditaj bönachi!

¡Yugu' biguínni xitsini', en yugu' biguínni xihui' tu'zóaba' xilátjagacaba' ni'!

<sup>3</sup> Caní guca que yödzö na' ni'a que le gulún bönachi nacuá' ni'.

Gulunë' ga gulún bönachi yúgu'të yödzö ca nácagaca le ta'zësö ladxi' le ruá' dö'.

Nupa ta'nná bë' luyú yödzölió gulunlen légaquië' le ruá' dö',

ate' guta' yöl-la' tsahui' quégaquië' bönni' to'o tuti'  
nacu'ë yödzölió  
tu' guyánda' yugu' le nazaca' gula'zé ladxi' bönachi  
ni'.

<sup>4</sup> Ní'irö biyönda' rui'i didza' ia'tú nu zoa yehua'  
yubá, rnna:

Guli'rúaj lu yödzö na', libíili' néquili' quia'  
para cabí gunli' dul-la' tsözxön len légaquië',  
en para cabí qui'i sáca'li' le gaca quégaquië'.

<sup>5</sup> Nayánda' dul-la' nabága'gaquië',

en chinayasa nadxín caz lúzxiba,

pero Dios röjnenë' le ruá' dö' núngaquië'.

<sup>6</sup> Buli'bí'i quégaquië' ca na' gulunë' queéli'.

Buli'bí'i quégaquië' chopá cö' tsca le gulunë'.

Buli'bí'i quégaquië' chopá cö' tsca le naca xihui'  
gulunë' queéli'.

<sup>7</sup> Guli'gún ga ila'gui'i ila'záquië', en ila'bödxi yéchë'ë  
tsca guca yöl-la' ba, en yöl-la' zxön gului'i  
cuíngäquië'.

Ta'zá' ládxí'gaquië', ta'nné':

Rö'ötu' ni, rinná bë'ëtu'.

Biti' nácatu' uzëbi, en catu caz cödxi yéchi'tu'.

<sup>8</sup> Que lë ni na', tu dzasö ila'dxín quégaquië' le  
ila'gui'i ila'záquië',

yöl-la' gutí, en yöl-la' ribödxi yechí', en yöl-la' ridún.

Iléguië' lu gui', tu' napa cazë' yöl-la' huáca zxön  
Xanru' Dios.

Lë cazë' usiúdxë' quégaquië'.

<sup>9</sup> Ní'irö gunné': "Ila'bödxi nupa ta'nná bë' luyú  
yödzölió, en gulún le ruá' dö' tsözxön len légaquië',  
en bulu'zí' xibé le nequi quégaquië'. Ila'bödxë', en  
ila'bödxi yéchë'ë cate' ila'lé'enë' dzön que yödzö  
zxön na' régui. <sup>10</sup> Zi'tu' zí'tu'sö ila'cu'ë tu' iládxinë'

ca gaca xíguia' le gaca que yödzö na', ate' ila'nné':  
¡Bica' bayechi' Babilonia, yödzö zxön ni, le gúcada'  
lo! ¡Tu dzasö guca xíguia' que!"

<sup>11</sup> Ní'irö gunnë': "Ila'bödxë' ca' bönni' to'o tuti'  
nacu'ë yödzölió, en ila'bödxì yéchë'ë ni'a que yödzö  
na' tu' cabirö soa nu ga'u bi ilúti'ë ni'." <sup>12</sup> Cúnturö  
nu ga'u ni':

Le néquiguequini oro, en plata,  
en yugu' guiöj zaca', en yugu' bugá,  
en yugu' lari' nazáca'da', en lari' xiná chul-la,  
en lari' dxí'ado', en lari' xiná guíido'os,  
en yugu' yaga rilá' zxixi,  
en le néquiguequini dxita nazáca'da',  
en le néquiguequini yaga nazáca'da',  
en le néquiguequini guíe cobre,  
en le néquiguequini guíe,  
en le néquiguequini guiöj jara.

<sup>13</sup> Cúnturö nu ga'u ni':  
Canel, en yugu' le rilá' zxixi, en yalaj,  
en le rilá' zxixi que mirra, en que yöj olíbano,  
en xisi uva nál-la, en le naca za,  
en yiözja dxí'ado', en zxoa' xtila,  
en yugu' bürrodo', en yugu' bö'cu' zxila',  
en yugu' bö'a', en yugu' carreta,  
en yugu' bönni' huen dxin, en ia'bal-la bönochí.

<sup>14</sup> Nupa na' to'o tuti' ilë légaquië', ila'nná:  
Nadúagaca le guzé ládxí'li'.  
Chigudödi quégaca yöl-la' tsahui',  
en le nácagaca lachi queéli',  
ate' bíti'rö idzölili' léguequi.

<sup>15</sup> Ní'irö gunnë': "Ila'bödxë' bönni' to'o tuti' na',  
tu' guta' quégaquië' yöl-la' tsahui' tu' gulúti'ë lu

yödzö na', ate' ila'cu'ë zi'tu' zí'tu'sö tu' iládxinë' ca gaca xíguia' le gaca que vödzö na', en ila'bödxi yéché'ë." <sup>16</sup> Ila'nnë':

¡Bica' bayechi' vödzö ni guca zxön!  
 Guca ca tu nigula nácunu lari' nazáca'da',  
 en lari' xiná chul-la, en lari' xiná guí'ido'os,  
 en nazí'i biquitaj queënu le néquiguequini oro  
 en le néquiguequini guiój zaca', en yugu' bugá.

<sup>17</sup> Tu dzasö guniti yöl-la' tsahui' que vödzö ni.

Ní'irö gunnë': "Yúgu'të bönni' xan barco, en nupa nacuá' lë'egaca barco na', en nupa tu'sá' yugu' barco na', en nupa tun dxin lu nísado', ila'cu'ë zi'tu' zí'tu'sö." <sup>18</sup> Cate' ila'lé'enë' dzön que vödzö na' régui, ila'bödxë', en ila'nnë': "¿Bízzilö vödzö guca zxön ca naca vödzö ni?"

<sup>19</sup> Ní'irö gunnë':  
 Ulu'dxië' bëchtö ícjagaquië'.  
 Ila'bödxë', en ila'bödxi yeché'ë, ila'nnë'.  
 ¡Bica' bayechi' vödzö ni guca zxön!  
 Yöl-la' tsahui' que vödzö ni ben ga guta' yöl-la'  
 tsahui'  
 quégaca yúgu'të nupa nácagaca xan barco lu nísado'.  
 Tu dzasö guniti vödzö ni.

<sup>20</sup> Buli'dzeja ca gaca que vödzö ni, libí'ili' zóali'  
 yehua' yubá,  
 enca' libí'ili' néquili' queë' Dios,  
 libí'ili', bönni' gubáz queë',  
 en libí'ili', bönni' rui'ili' didza' uláz queë'.  
 Buli'dzeja, tu' chiguchúguië' Dios que vödzö ni  
 ni'a que bi gulún queëli' nupa nacuá' lu vödzö ni.

<sup>21</sup> Ní'irö tuë' gubáz lá'ayi nál-la buchissë' tu guiój zxön le naca ca tu guichi riyëtu, ate' gurú'unë' le lu nísado', gunnë':

La' canísö gaca que yödzö Babilonia,  
 tu' iguínnaj yödzö na' guca lo,  
 ate' bíti'rö nu udzöli le.

**22** Bíti'rö nu yöni lu yödzö na' nupa ta'guínni lë'e le  
 rul-la,

en calëga nupa tu'cödxi gui  
 en calëga nupa tu'cödxi lúzuba' böa' bëdxi.  
 Bíti'rö udzöli bönni' huen dxin ni',  
 en bíti'rö yöni bö rigú'u le rutu ni'.

**23** Bíti'rö uzení' nitú guí' lu yödzö na',  
 en biti' yöni chi'ë bönni' rutsaga né'ë ni',  
 en calëga chíibi' bi'i nigula rutsaga ná'abi'.

Caní gaca sal-la' nácali' lo, libí'ili' rá'uli', en rúti'li'  
 lu yödzö ni,

en guzxí' yé'eli' bönachi idútë yödzölió len yöl-la'  
 gudzá' queéli'.

**24** Lu yödzö ni gulaj xichöngacuie' bönni' gulu'ë  
 didza' uláz queë' Dios,

en xichöngaca nupa néquiguequi queë' Dios,  
 enca' xichöngaca yúgu'të bönachi yödzölió,  
 tu' bétigaca nupa nacuá' yödzö ni léguequi.

## 19

**1** Gudödi lë ni biyönda' tu'i zidzaj didza' bönachi  
 zián nacuá' yehua' yubá, ta'nná:  
 ¡Yöl-la' ba Dios! ¡Yöl-la' rusolá runë',  
 ate' yöl-la' zxön, en yöl-la' unná bë' napë' Dios  
 queëru'!

**2** ¡Naca idútë li, en tsahui' ca rusiúdxë'!  
 ¡Guchúguië' que yödzö na' naca ca tu nigula udá  
 dzaga,  
 en quégaca bönachi lu yödzö na' ila'niti tsaz!

¡Gulún ditaj bönachi yödzölió tu' nözi le ruá' dö' gulunë'!

¡Dios buzí' lëbë' lëgaquië'  
tu' gulútië' yugu' huen dxin queë'!

<sup>3</sup> Leyübölö gula'nné': “¡Yöl-la' ba Dios!  
¡Cuéntica'sö dzön ga régui yödzö na'!”

<sup>4</sup> Idapa uru'ë bönni' gula ni' bulu'tsaga lógaquië'  
lu yu tsözxön len idapa nupa ni' nabángaca, en  
ta'yéaj ládx'i'gaquië' Dios, Bönni' rö'ë lataj lo queë'.  
Gula'nné': “¡Ca' gaca! ¡Yöl-la' ba Dios!”

<sup>5</sup> Ni'irö biyönda' ruí'i didza' tu nu zoa lataj lo na',  
rnna:

¡Guli'cu'ë Dios queëru' yöl-la' ba  
yúgu'teli' runli' xichinë', libí'ilí' na' rádxili' Lë',  
nácali' bönachi cá'asö, en bönachi lo!

*Laní que yöl-la' rutsaga na' queë' Bönni' náquië'  
Bö'cu' Zxíla'do'*

<sup>6</sup> Biyönda' ca' nu ruí'i zidzaj didza', le biyön ca  
riyön cate' tuí'i didza' bönachi zián, en biyön ca' ca  
riyön ga ridödi tu yegu zxön, o ca riyön cate' rinnë  
guziú', ate' rnna:

¡Yöl-la' ba Dios tu' risí lahuë' rinná bë'ë!  
¡Napa cazë' yöl-la' huáca!

<sup>7</sup> ¡Ral-la' udzeja ládx'i'ru', en uzí'iru' xibë',  
en cú'uru'-në' yöl-la' ba  
tu' chibidxín dza laní que yöl-la' rutsaga na'  
queë' Bönni' na' náquië' Bö'cu' Zxíla'do'!

¡Si' lu në'ë Cristo nupa néquiguequi queë'!  
¡Chinabá'a queëbi' bi'i utsaga ná'alenbi' Lë'!  
¡Nácabi' le rulu'i nupa na' néquiguequi queë'!  
<sup>8</sup> ¡Dios ru'ë-bi' lataj gácubi' lari' nazáca'da'  
le naca idú, en rëpi yösa bení'!

Lari' nazáca'da' na' rulu'i le naca tsahui' núngeaca nupa néquiguequi queë' Dios.

<sup>9</sup> Ní'irö gubáz lá'ayi na' gudxë' neda', gunnë': "Buzúaj lu guichi didza' ni: ¡Bica' bágaca nupa na' nulidzë' Dios légaquië' para ila'cu'ë laní que yöl-la' rutsaga na' queë' Bönni' náquië' Bö'cu' Zxíla'do'!"

Gudxë' ca' neda': "¡Yugu' didza' idútë li ni ru'ë didza' Dios caz!"

<sup>10</sup> Buzóa zxiba' xini'ë gubáz lá'ayi na' para tseaj ládex'a lë', pero gudxë' neda': "¡Biti' gunu' caní! Neda' ca' naca' huen dxin queë' Dios ca nacu' li', en ca nácagaquië' böchi' luzó'o nazí' lu ná'agaquië' le naca idútë li ca naca queë' Jesús. ¡Guyéaj ládxë'ë Dios!"

Nupa tuí'i didza' uláz queë' Dios, tuí'i didza' le naca idútë li ca naca queë' Jesús.

### *Bönni' dxië'-ba' böa' chiguichi*

<sup>11</sup> Ní'irö bilé'eda' nayalaj lúzziba, ate' bulu'i loba' tuba' böa' chiguichi, ate' lë' Bönni' dxië'-ba', Nu Run Ca Rnna, enca' Nu Ruí'i Didza' Le Nácatë. Caní lë' tu' ruchi'a rusöröe' ca naca le naca idútë li, enca' caní tsejë' gudil-la. <sup>12</sup> Rëpi yösa bení' guiój lahuë', le nácagaca ca gui', en dxiagaca icjë' zián le néquiguequini oro. Nazúaj lahuë' tu le lë', le cuntu nu nözi, pero tuzë' Lë' nözinë'. <sup>13</sup> Nácuë' tu lari' né'aj rön, en lë' ca' "Nu Naca Xtídzë'ë Dios."

<sup>14</sup> Röjnógaquië' Lë' ni'a né'ë guizxi yu nacu'ë yehua' yubá, dxiagacië'-ba' böa' chiguichi, en nácugaquië' lari' nazáca'da', le naca chiguichido'os, en biti' naca bösaj. <sup>15</sup> Rirúaj ru'ë le naca ca tu guië' tuchi' le gúninë' zi' bönachi yugu' yödzö. Inná bé'enë' légaquië' len tu xiyaga guië', en gunë' légaquië' xíguia', le gaca quégacië' ca raca que le ribía lubá

uva, zoa nu rulibi léguequi, tu' riléde'ené' Dios, Bönni' napa cazë' yöl-la' unná bë'. <sup>16</sup> Nazúaj lularí' nácué', enca' lu xigatsjë' ca lë', "Bönni' Rinná Bé'ené' Nupa Ta'nná Bë", enca' "Bönni' Náquië' Xángaca Nupa Nácagaca Xan."

<sup>17</sup> Ní'irö bilé'eda'-në' tuë' gubáz lá'ayi zuínë' lu gubidza, ate' bë'ë zidzaj didza', en gudxë'-ba' böa' ta'daba' lúzxiba, rnnë': "¡Guli'dá, buli'dubi ga ni gáguli' laní zxön queë' Dios! <sup>18</sup> Gáguli' xipëla'gaca nupa ta'nná bë', en xipëla'gaca nupa ta'nná be'e bönni' röjáquië' gudil-la, en xipëla'gaca nupa nál-lagaca, en xipëla'gacaba' böa', en xipëla'gaca nupa ta'bía légacaba', en xipëla'gaca yúgu'të bönachi, nupa biti' nadó'ogaca, en nupa nadó'ogaca, nupa nácagaca cá'asö, en nupa nácagaca lo."

<sup>19</sup> Ní'irö bilé'eda'-ba' böa' sínia' na', enca' yugu' bönni' ta'nná bë'ë yödzölió, en bönni' röjáquië' gudil-la guizxi yu quégäquië', nudúbigaquië' para ilúnlenë' gudil-la Bönni' dxíë'-ba' böa' chiguichi, dzágagaca Lë' ni'a në'ë guizxi yu. <sup>20</sup> Bidzunba' böa' sínia' na', enca' bönni' na' bë'ë didza' uláz queëba', bönni' na' benë' yugu' le nácada' bë' loba', en guzxí' yé'ené' nupa ni' gului'i lataj nu uzúaj láhuiguequi lë na' naca bë' dá'gaca lëba', en gula'yéaj ládxí'gaca budó' queëba'. Böa' sínia' na', enca' bönni' na' bë'ë didza' uláz queëba', gula'rú'unë' léguequi nabángacasö ca' ga rö'ö gui' zxön le réguilen lë na' ruzégui'da'. <sup>21</sup> Bönni' na' dxíë'-ba' böa' chiguich bëtië' yúgu'të nupa na' gudá'gaca léguequi len guië tuchi' na' rirúaj ru'ë, ate' bulu'huöljaba' yúgu'tëba' böa' na' ta'daba' lúzxiba, tu' guláguba' xipëla'guequi.

# 20

## *Chi gayuá' iz*

<sup>1</sup> Gudödi lë ni bilé'eda' ruhuötjë' tu gubáz lá'ayi, zë'ë yehua' yubá, en zönë' zxí'ini guíë que lataj chul-la, ate' nu'ë tu du guíë yödx. <sup>2</sup> Guzxönë'-ba' bëla zxön xitsiní' na', nácaba' bëla guzóaba' dza ni'te, bëla na' lëba' Tu' Xihui', enca' Satanás, ate' bégueë'-ba', en bucá'anë'-ba' caní chi gayuá' iz. <sup>3</sup> Yöjchú'unë'-ba' lataj chul-la, en busayjë' lataj na', ate' budé'ë tu le riguela' le rusayaj lataj na' para cabirö si' yé'eba' böñachi yugu' yödzö ga izá'arö chi gayuá' iz na', ate' tödi ni' ral-la' yédxiba' tu chí'ido'.

<sup>4</sup> Ní'irö bilé'eda' yugu' lataj gapa ta'bö' nupa ta'nná bë', ate' nupa bila'deli' ulu'chi'a ulu'sörö le raca ta'bö' yugu' lataj na'. Bilé'eda' ca' yugu' bö' gulaca caz böñachi bulu'rixë' yénguequi yugu' bönni' biti' nácagaquië' tsahui' tu' gulún ba nalí queë' Jesús, en tu' gulún libán que xtídzë'ë Dios. Yugu' böñachi ni biti' gula'yéaj ládxi'gaca bö'a' sínia' na', en budó' queëba', en biti' gului'i lataj nu uzúaj ra' xigáguequi, o lu në'eguequi lë na' naca bë' nu da' lëba'. Bulu'bán nupa ni lu yöl-la' guti, ate' gula'nná bë'len Cristo chi gayuá' iz, <sup>5</sup> pero ia'zíca'rö böñachi nátigaca biti' bulu'bán. Cate' izá'arö chi gayuá' iz na' ulu'bán. Yöl-la' rubán lu yöl-la' guti guca ni naca le raca zí'alö. <sup>6</sup> ¡Bica' ba, en bica' lá'ayi nupa ta'deli' yöl-la' rubán na' raca zí'alö! ¡Yöl-la' guti le raca burópilö biti' bi gaca gun quéguequi, pero ilácagaca bixúz queë' Dios, enca' queë' Cristo, ate' ila'nná bë'len Lë' chi gayuá' iz na'!

<sup>7</sup> Cate' izá'a chi gayuá' iz na', ulu'sanë' Satanás ga na' nadzún. <sup>8</sup> Urúaj Satanás, en tsöjzxí' ye'e

bönachi yugu' yödzö nacuá' idapa la'a yödzölió. Si' ye'e ca' bönnachi yödzö Gog, en yödzö Magog, ate' utubi léguequi lu gudil-la. Tsca nácagaca nupa ni, nácagaca ca naca yuzxi rö'ö tu ra' yegu zxön.

<sup>9</sup> Guizxi yusö gula'dödë' idútë luyú, ate' gula'cu'ë lë'ajlö lataj ga na' nacuá' bönnachi néquiguequi queë' Cristo, le naca yödzö na' nadxí'inë' Dios. Ní'irö benë' Dios ga böxaj guí' le birúaj yehua' yubá, le buzegui' légaquië'. <sup>10</sup> Tu' xihui' na' nazí' ye'e légaquië', yöjchú'unagaquië' le ga rö'ö guí' zxön que lë na' ruzégui'da', ga na' chizóaba' böa' sínia' na', enca' bönni' na' bë'ë didza' uláz queëba'. Ila'gu'i ila'zaca' ni' rëla, en te dza yúgu'të iz zá'gaca.

*Ta'dxín bönnachi lahuë' Dios ga rö'ë ruchi'a rusöröë'*

<sup>11</sup> Ní'irö bilé'eda' tu lataj lo chiguichi, en bilé'eda' ca' Nu rö'ö ruchi'a rusöröë' lataj na'. Lahui' lo Nu ni gula'nítë yödzölió, en lúzxiba, ate' bíti'rö budzöli xilátjaguequi. <sup>12</sup> Bilé'eda' ca' nupa chinátigaca, nupa nácagaca lo, en nupa nácagaca cá'asö, zuíguequinë' lahuë' Dios. Gula'yálaj guichi, en guyalaj ca' ia'tú guichi ga na' nazúajgaca lágaca nupa nadéli'gaca yöl-la' na'bán idú. Buchi'a busöröë' Dios nupa na' chinátigaca tsca naca le nazúaj yugu' lu guichi na', lë na' gulúngaca. <sup>13</sup> Lu nísado' bulu'rúaj nupa chinátigaca, nacuá' lu nísado'. Lu yöl-la' guti, en lu lataj chul-la bulu'rúaj nupa chinátigaca, gula'cuá' gapa ni', ate' buchi'a busöröë' Dios tu tu tsca naca le gulúngaca. <sup>14</sup> Ní'irö yöjtsázagaca yöl-la' guti, en lataj chul-la ga ni' rö'ö guí' zxön le naca lataj que yöl-la' guti le raca burópilö. <sup>15</sup> Nupa biti' nazúajgaca lu guichi quégaca

nupa nadéli'gaca yöl-la' na'bán idú yöjtsázagaca lataj na'.

## 21

### *Tu lúzxiba cubi, en tu luyú cubi*

<sup>1</sup> Gudödi na' bilé'eda' tu lúzxiba cubi, en tu luyú cubi, tu' chigudödi quégaca lúzxiba na', en luyú na' gula'cuá' zí'alö. Bíti'rö dë nísado'. <sup>2</sup> Neda', Juan, bilé'eda' yödzö lá'ayi na', le naca Jerusalén cubi, ruhuötaj, rirúaj yehua' yubá ga zoë' Dios, en chinabá'a que ca nabá'a queébi' bi'i nigula chizóa utsaga ná'alenbi' tu bönni'. <sup>3</sup> Biyönda' ruí'i didza' nu rnna yehua' yubá: “¡Buli'yútsöca'! ¡Ga zoë' Dios zóalen bönachi! ¡Sóalenë' léguequi, ate' léguequi ilácagaca bönachi queë'! ¡Dios caz sóalenë' léguequi, en gáquië' Dios quéguequi! <sup>4</sup> Dios uzxië' nisa ribödxi zoa guiøj lóguequi. Cúnturö nu gati, en cúntrö nu cödxi, en cúntrö nu cödxi yechi', en cúntrö nu qui'i saca', tu' chigudödi quégaca lë na' gulaca zí'alö.”

<sup>5</sup> Ní'irö Nu na' rö'ö lataj lo ni' gunná: “¡Buyútsöca'! ¡Yúgu'të ruúna' cubi!”

Gudxi ca' neda': “¡Buzúaj lu guichi lë ni, tu' naca idútë li didza' ni, en naca lözal!”

<sup>6</sup> Ní'irö gudxi neda': “¡Chinaca caz! ¡Neda' naca' Nu zoa zí'atëlö, enca' Nu röjsete ca naca le risí lo, en le ruúdxítë! ¡Nu ribidxi nisa, neda' guna' ga gui'aj nisa na' runna yöl-la' na'bán! <sup>7</sup> Nupa ila'deli' lu le raca yödzölió, gaca quéguequi yúgu'të lë ni. Neda' gaca' Dios quéguequi, ate' léguequi ilácagaca zxi'ini caza', <sup>8</sup> pero nupa tadxi, en nupa biti' ta'yéajlë' neda', en nupa nácagaca xihui', en

nupa tun le biti' naca tsahui', en nupa nácagaca udzá', en nupa ta'yéaj ládxí'gaca budó' guiój budó' yaga, en yúgu'té nupa ta'zí' yé', chizóa riböza xilátjaguequi lu guí', ga ni' rö'ö guí' zxön que lë na' ruzégui'da', lë na' naca yöl-la' guti le raca burópilö."

### *Yödzö Jerusalén le naca cubi*

<sup>9</sup> Ní'irö tuë' gubáz lá'ayi nababë' gadxë' gubáz lá'ayi ni' gula'zönë' gadxi zxíga'do' yúdxugaca gadxi yödzöhué' yöjsétegaca, bidë' ga zoa'. Gudxë' neda': "¡Gudá ni! ¡Uluí'ida' li' bi'i nigula na' si' utsaga ná'alenbi' Bönni' na' náquië' Bö'cu' Zxíla'do'!"

<sup>10</sup> Guzóalenë' Dios Bö' Lá'ayi neda', ate' guchë'ë gubáz lá'ayi na' neda' tu lu guí'a sibi, en bu-luí'inë' neda' yödzö lá'ayi Jerusalén, ruhuötaj, rirúaj yehua' yubá ga zoë' Dios. <sup>11</sup> Yödzö ni rëpi yösa bení' tu' zóalen le yöl-la' bení' queë' Dios. Rëpi yösa bení' ca rëpi yösa bení' tu guiój nazáca'da' ca naca guiój gui'do'os nazí'i le jaspe. Naca yödzö na' yení'ido' ca naca guiój jara. <sup>12</sup> Zoa tu zö'ö zxön, en sibi idú gásibi'ilö yödzö na'. Lë'e zö'ö na' nacuá' chinnu gapa nu riyaza. Ra' gapa nu riyaza na' nacu'ë chinnuë' gubáz lá'ayi tapa chi'ë. Tu tu ga nu riyaza na' nazúaj tu tu lágaca idxinnu cö' dí'a dza zxí'ini xi'sóë' Israel. <sup>13</sup> Lë'e zö'ö le ruyú saca' ga rilén gubidza nacuá' tsonna gapa nu riyaza, en saca' ga za' bö' ziaga nacuá' tsonna gapa nu riyaza, en saca' tsölá'a ga ridödi gubidza beo' ziaga nacuá' tsonna gapa nu riyaza, en saca' ga ribía gubidza nacuá' ca' tsonna gapa nu riyaza. <sup>14</sup> Xzan zö'ö que yödzö na' nacuá' chinnu xilibi zö'ö, ate' lë'egaca

xilibi zö'ö na' nazúajgaca lágaquië' idxínnutë' bönni' gubáz queë' Bönni' na' náquië' Bö'cu' Zxíla'do'.

<sup>15</sup> Gubáz lá'ayi na' ruí'ilenë' neda' didza' zönë' tu yaga urixi le néquini oro para urixë' tsca naca yödzö na', en tsca nácagaca gapa nu riyaza, en tsca naca zö'ö que. <sup>16</sup> Yödzö na', lédi'i nácagaca idapa la'a. Lédi'i naca yöl-la' tunna que, en yöl-la' blaga' que. Len yaga na' burixë' tsca naca yödzö na', naca idú tsca gaca nu sa' idú chinnu dza, ate' lédi'i naca yöl-la' tunna que, en yöl-la' xitsá' que, en yöl-la' böläga' que. <sup>17</sup> Burixë' ca' yöl-la' yödx que zö'ö na', naca tu gayuá' yu' tapa-un dxita, tsca naca dxita que na' böñachi, lë na' ruríxinë' gubáz lá'ayi na'.

<sup>18</sup> Zö'ö na' néquini guiöj jaspe, ate' yödzö na' néquini órotëz, le naca yení'ido' ca naca guiöj jara. <sup>19</sup> Yugu' xilibi zö'ö que yödzö na' nazí'gaca biquitaj guiöj nazáca'da'gaca.

Xilibi zö'ö zí'alo néquini guiöj jaspe.

Le buropi néquini guiöj zafiro.

Le bunni néquini guiöj ágata.

Le budapi néquini guiöj esmeralda.

<sup>20</sup> Le guyu' néquini guiöj ónice.

Le buzxopi néquini guiöj cornalina.

Le igadxi néquini guiöj crisólito.

Le izxunu' néquini guiöj berilo.

Le igá néquini guiöj topacio.

Le idxí néquini guiöj crisoprasa.

Le idxinéaj néquini guiöj jacinto.

Le idxinnu néquini guiöj amatista.

<sup>21</sup> Chinnu gapa nu riyaza na' ta'yáyjani chinnu bugá. Tu tu ga nu riyaza na' riyáyjani tuz bugá.

Luyú la' nöza lo que yödzö na' néquini órotëz, le naca yení'ido' ca naca guiøj jara.

<sup>22</sup> Biti' bilé'eda' tu yudo' lu yödzö na', tu' náquië' Xanru' Dios yudo' que, napa cazë' idútë yöl-la' unná bë', en lësca' caní náquië' Bönni' náquië' Bö'cu' Zxíla'do', náquië' yudo' que yödzö na'. <sup>23</sup> Biti' run bayudxi tsení'gaca gubidza, en beo' lu yödzö na', tu' uzení' yöl-la' bení' queë' Dios lu yödzö na', ate' lësca' Bönni' náquië' Bö'cu' Zxíla'do' náquië' le uzení' ni'. <sup>24</sup> Bönachi yugu' yödzö, nupa nulágaca, ila'dá lu bení' que yödzö na', ate' yugu' bönni' ta'nná bë'ë yödzölió idiguá'agaquië' yöl-la' tsahui' quégäquië' lu yödzö na'. <sup>25</sup> Catu caz tsáyajgaca gapa nu riyaza lu yödzö na' lahuí' dza, ate' lataj na' catu caz gaca rëla. <sup>26</sup> Bönachi yugu' yödzö idiguá'agaquië' ni' le nácagaca lesaca', en yöl-la' tsahui' quéguequi. <sup>27</sup> Tu le ruá' dö' biti' ca' tsaza ni', en calëga tu le naca xihui', en calëga nu rizi' yë', pero tsázagacasö ni' nupa nazúajgaca láguequi lu guichi queë' Bönni' náquië' Bö'cu' Zxíla'do', ga na' nazúajgaca lágaca nupa nadéli'gaca yöl-la' na'bán.

## 22

<sup>1</sup> Ní'irö gubáz lá'ayi na' buluí'inë' neda' tu yegu yení'ido', le naca nisa yegu le runna yöl-la' na'bán. Rëpi yösa bení' yegu na' ca rëpi yösa bení' guiøj jara. Rirúaj yegu na' lu lataj lo ga rö'ë Dios, en ga rö'ë ca' Bönni' náquië' Bö'cu' Zxíla'do'. <sup>2</sup> Rizá' yegu ni gatsaj láhui'lö nöza lo que yödzö na'. Tsólá'a huéaj ra' yegu na' rö'ö tu yaga le runna yöl-la' na'bán, ate' ta'bía chinnu luzuí tu iz. Tu tu beo' ta'bía yaga na'. Xilágui'gaca yaga na' nácagaca le tu'ún böñachi yugu' yödzö. <sup>3</sup> Biti' soa ni' nitú le dxía dö'.

Soa lu yödzö na' lataj lo ga rö'ë Dios, enca' ga rö'ë Bönni' náquië' Bö'cu' Zxíla'do', ate' yugu' huen dxin queë' ila'yéaj ládzi'gaquië' Lë'. <sup>4</sup> Ila'lé'enë' lahuë' Lë', ate' le nazí'i Lë' nazúaj ra' xigágaquië'. <sup>5</sup> Biti' gaca rëla ni', ate' nupa nacuá' ni' biti' ila'quínma tu le cu'u bení', en calëga bení' que gubidza, tu' gáquië' Xanru' Dios bení' quégaquië'. Nupa nacuá' ni' ila'nná bë'tica'sö.

### *Chizóa huödë' Cristo*

<sup>6</sup> Ní'irö gubáz lá'ayi na' gudxë' neda', gunné': "Didza' ni naca idútë li, en naca löza. Xanru' Dios, Nu ruchiza Bö' Lá'ayi icja ládzi'do'gaquië' yugu' bönni' tu'ë didza' uláz queë', chigusöl-lë'ë gubáz lá'ayi queë' para ului'inë' yugu' huen dxin queë' le ral-la' gácatë. <sup>7</sup> Caní rnnë' Jesucristo: ¡Chizóa huöda! ¡Bica' ba nu run ca rnna didza' ruá'a uláz queë' Dios, le nazúaj lu guichi ni!"

<sup>8</sup> Neda', Juan, biyönda', en bilé'eda' yugu' lë ni. Gudödi biyönda', en bilé'eda' yugu' lë ni, buzóa zxiba' xini'ë gubáz lá'ayi na' bului'inë' neda' yugu' lë ni para guna' lë' zxön. <sup>9</sup> Ní'irö lë' gudxë' neda': "Biti' gunu' caní, tu' naca' neda' huen dxin queë' Dios ca nacu' li', en ca nácagaquië' böchi' luzó'o na' tu'ë didza' uláz queë' Dios, enca' ca nácagaca yúgu'të nupa tun ca rnna le nazúaj lu guichi ni. ¡Ben zxön Dios!"

<sup>10</sup> Gudxë' ca' neda': "Biti' ucachu'u xtídzë'ë Dios ni, didza' ruá'a uláz queë', en nazúaj lu guichi ni, tu' chizóa ilaca yugu' lë ni. <sup>11</sup> Nu ruá' dö' guá'tica'sö dö'. Nu run le cabí naca tsahui' gúntica'sö le cabí naca tsahui'. Nu run dxi'a, gúntica'sö dxi'a, ate' nu nequi quez queë' Dios, guéquitica'sö quez queë'." <sup>12</sup> Rnnë' Jesús: "¡Chizóa huöda! Nu'a lu na'a le

nadéli'gaca bönachi, ate' ubi'a que queéguequi tsca naca le gulúngaca. <sup>13</sup> Neda' naca' Nu zoa zí'atëlö, enca' Nu röjsete, ca naca le risí lo, en le ruúdxitë. Naca' ca' Nu run ga risí lo, en Nu rusiúdxi."

<sup>14</sup> Ní'irö gunné': "¡Bica' ba nupa nayari le nácugaca, en tun le naca dxi'a! ¡Nazí'guequi lataj ilahuë' le ribía yaga le runna yöl-la' na'bán, en gaca ila'yaza gapa nu riyaza lu yödzö na'! <sup>15</sup> Nupa nácagaca xihui', en nupa nácagaca udzá', en nupa tun le ruá' dö', en nupa tuti bönachi, en nupa ta'yéaj ládzi'gaca budó' guiój budó' yaga, en nupa ta'yaza ládzi'gaca ta'zí' yé' ila'cuá' ní'ilö ra' yödzö na'. <sup>16</sup> Neda', Jesús, gusól-la'a gubáz lá'ayi quia', ate' buluí'inë' libí'ili' yugu' lë ni, libí'ili' na' dzágali' yugu' cö' bönachi quia'. Neda' naca' di'a dza queë' David, enca' zxí'ini xi'sóë'. Naca' ca' böläj hui sila."

<sup>17</sup> Tu'ë didza' Dios Bö' Lá'ayi, enca' bi'i nigula utsaga ná'alenbi'-në' Bönni' náquië' Bö'cu' Zxíla'do', ta'nnë': "¡Gudá!"

Nu riyöni didza' ni ral-la' inná: "¡Gudá!"  
¡Nu ribidxi nisa, en nu rizé ladxi' le, ral-la' guídi, en guí'aj nisa le runna yöl-la' na'bán!

<sup>18</sup> Neda', Juan, ruzéajni'ida' nupa ta'yöni didza' ni ruá'a uláz queë' Dios, en nazúaj lu guichi ni, rnñia': Channö nu udá' lë'e didza' ni, Dios ubi'ë que nu na'. Gunë' lë' xíguia' ca naca le nazúajgaca lu guichi ni. <sup>19</sup> Lësca' caní, channö nu cúa bíti'tës didza' ni ruá'a uláz queë' Dios, en nazúaj lu guichi ni, Dios ugúë' ca' xilataj nu na' lu guichi ga nazúajgaca lágaca nupa nadéli'gaca yöl-la' na'bán idú, enca' lu yödzö lá'ayi, ca na' nazúaj quéguequi lu guichi ni.

**20** Xanru', Nu run ba nalí quéguequi lë ni rnnë':  
“¡Ön! ¡Huödatea’!”  
¡Ca' gaca! ¡Gudá, Xantu' Jesús!  
**21** Rinábida'-në' Xanru' Jesucristo uzá' ládxë'ë  
queëli' yúgu'tëli'. ¡Ca' gaca!

**Didza' cubi rucá'ana tsahui'  
New Testament in Zapotec, Rincón (MX:zar:Zapotec,  
Rincón)**

copyright © 2009 Wycliffe Bible Translators, Inc.

Language: Zapotec, Rincón

Translation by: Wycliffe Bible Translators, Inc.

Zapotec, Rincón

zar

Mexico

**Copyright Information**

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Zapotec, Rincón

**© 2009, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

## lix

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files  
dated 29 Jan 2022

58bf86df-ae22-508c-81dc-936dbf138c25